



Punjab Kings captain asütsü
Mayank Agarwal shimogo



Foreign Secretary Shringla-i
Ukraine tensa indang metetdaksü

Nagaland sorkar mapa atema arishi küm 2 ajemtsür

Dimapur, February 28, 2022 (TYO): Nagaland Governor-i April 22, 2021 nungi tenzük sorkar mapa nung anioxtsü atema arishi küm ana ajemtsür ta Chief Secretary J Alam, IAS-i tanü metetdaksü.

sorkar mapa nung nisung shimokba noktanga ajanga recruitment activities meinyakteti aruba atema ajemtsür, ta paisa ashi. February 22, 2022 nü Cabinet telemtetba agiba nung ajemdaker iba sangdong agütsür, ta Chief Secretary-isa ashi.

Nagaland nung District SP tem nem gari tasen agütsür

Dimapur, February 28, 2022 (TYO): February 28, 2022 nü Deputy Chief Minister aser Home Minister, Y. Patton-i District SP tem nem gari tasentem agütsü.

maparen inyakba ajanga loktiliba aser lanuputu ajangzüksü imlar" ta paisa metetdaksü.

Police Headquarters, Kohima nung sentong ka agidang District SPs nem Mahindra Scorpio gari 11 agütsüsü ta Y. Patton-i metetdaksü.

Nagaland Police-isa tashiyim agi sen saruba inyakyim azüoktsü atema mapa inyaktsü aser ozüing alema inyakertem ozüing tesashi agi merenshitsu, ta paisa shisem.

"Police Department indang inyakyim nung tensa mashii mapang yakta senzüsüba ka lir aser SP tem nem gari tajungba agütsüba ajanga parnoki tensa ajak nung len ania mapa inyaktsü imlar" ta pai ashi.

"Punjab election nung mapa tajung inyakba atema IRBs nem tenüsang agütsür. Parnok ya tang Manipur election atema mapa lemzükja lir. State sorkari Police Department akokka tashi yaritsü" ta Y Patton-isa metetdaksü.

"December 4, 2021 nü Oting lendong dak alaka Nagaland nung tensa kanga süngjema kümogo. Oting lendong nung takoksa ajururtem nem temetem agütsüsü. SIT-i bushisüingdanga nung kulikaket kar dang manguba dak alaka joko tatembangleni arur" ta Y Patton-isa shisem.

Iba sentong nung Director General of Police, T. John Longkumer-i Deputy Chief Minister dang pelaba metetdaksü.

"Nagaland Police-i tawa Rs. 23 crore alangba hon seret 48 shi apaba, mozi aser IMFL apaba atema tenüsang agütsür. Nagaland Police-i maneni 'War on Drugs'

Deputy CM Y Patton-i lenisüba kübok tesüba küm asem tsüingda NPS cadre review inyakogo aser district tasentem nung SP rank officers tasen shimogo, ta pai ashi.

COVID-19 Nagaland: 5 dak putet, 15 taneptsü angu

Kohima, February 28, 2022 (TYO): Nagaland nung Hombarnü nisung 5 dak COVID-19 putet aser 15 taneptsü angu.

109 anepaludar saka parnok 95 dakbo shirangba yimya kecha mali.

Tanü Dimapur nung nisung 4 aser Mokochung nung nisung ka dak COVID-19 putet.

February 27 tashi nung arishi küm 15 nungi 18 tsüingda tainyinlong 79,159 nem COVID-19 vaccine agütsüogo.

Külen taneptsü angurtem Dimapur nung nisung 9, Mokochung nung 2 aser Peren, Phek, Tuensang o Wokha nung kaka (1) lir.

Kasa mapang, arishi küm 18 nungi temapur nisung 8,13,900 nem COVID-19 vaccine indang dose 14,65,047 agütsüogo.

Nisung 35,407 rongnungi 33,065 taneptsü nguogo aser iba ya taneptsü angur 93.39% lir.

Vaccine agirtemji frontline workers 61,041, healthcare workers 16,017, arishi küm 45 ser temapur 2,20,662 aser arishi küm 18 nungi 44 tsüingda alir 5,16,180 lir.

Nagaland nung tang nisung

NENSHIA SANGDONGER

Taoba Mongputeni 2, 2021 anogo, Arok Osep Yanglushiba Luden mezüingbuba senden lemtet No. B (i-iii), Dt. 02.10.2021, Ao Senden Tongror Luden dangi yoka liasü. Luden-i yokba onük ajak Tongror Luden kinük ajaklen nungi asadanga jembir, lemtet No. AS/Gen-6/2021/781, Dt. 2/11/2021 ajanga temelaba agütsü nung, iba dak amendaker Arok Osep yanglushitsu lemtetogo.

Anungji Arok Osep nung enoktsü atema nüburttem rongnung, temulungur ajak nungi "Ao ojang aser tetezü" bendentsü sangdonger. Shirnokisa iba nung yaritepnür parnoki teküpoklen agüja aliba inyakyim tarenen nung ajemdaker shilem agitsü akok:

- (a) Ojang ajak Computer nung type sür, hard & soft copy agütsüsü, mesüra ASLB E-mail (aosendenliterature@gmail.com) nung yoktsü akok.
- (b) Shibai yokdir pei tenüing, taliba tesem aser Mobile number tejangja dena yoktsüla.
- (c) Ojang kwi yokdir yokaka tetezü tejangja dena yoktsüla.
- (d) Nai agütsüba ojangtemji Arok Osep Yanglushiba Luden-i asadanger, nungdabatem agiteta enoktsü aser tanüngbatem tarutsü asoshi (Archive nung) rizünga yutsüsü.
- (e) Shilem agirtem ajaki Yimpöksü (November), 2021 - Rongchii (April), 2022 tashi nung ASLB ket tongtsüsü 'nenshia' metetdaksür.

Yamaji nüburttem ajak yaritepnür nung iba Arok Osep terenemjem ta mesüka, akok tashi tajungtiba nung inyaktsü tebilemba nung iba maparen tenzükur. Anungji nübür ajaki mulungsoa yariteptsü imlaa atar.

Nübür tenzükba nung,
Sd/-

S. Wati Ozüküm, Luden Tayonger

Moldova ajanga India nung Ukraine nungi senso 1,396 tashi anir aruogo

New Delhi, February 28, 2022 (Agencies): Ukraine nung anendaka aliba India nung atema Moldova linük ajanga senzüsü lenmang tasen ka ngutetogo, ta Ministry of External Affairs (MEA)-i Hombarnü metetdaksü.

Ukraine anüolen tsütsü aotsü mepishir, saka nisungtem kanga nungteper asü nung indangindanga arrtsüleni maotsüla. Anasa aliba yimitem nung oa jenokang kechiyong onoki item yimti nung mapa inyaker aser MHA teloktemi nenok yaritsü. Nenok petsaprong masütsüla kechiyong tayimtsü peria dang renema lir" ta paisa metetdaksü.

"Iba lenmang lapokogo aser MHA teloki nungdabkapurtem yaritsü renema lir. Parnoki Romania ajanga India nung anir arutsü" ta MEA spokesperson Arindam Bagchi-i ashi.

"India-i Ukraine nem mozütem den humanitarian aid bener yoktsü" ta Arindam Bagchi-isa ashi.

"Moldova nungi India nung anir aruba maparenji Aviation minister Jyotiraditya Scindia-i ketdangüsü reprangtsü. Union minister Kiren Rijju-i Slovak Republic nung, Union minister Hardeep Singh Puri-i Hungary nung aser Union minister VK Singh-i Poland nung yariteptsü" ta Bagchi-isa ashi.

ODESSA NUNGI KAKETSHIR AIKAMOLDOVA TONGOGO:

Ukraine kübok Odessa yimti nung azünger India nung kaketshir 1000 shi jungnüa Deobarnü bus garitem ajanga Moldova linük tongogo.

Iba sentong nung Director General of Police, T. John Longkumer-i Deputy Chief Minister dang pelaba metetdaksü.

Odessa yimti ya Black Sea nung rong anendak tongti tesem ka lir aser February 24 nü Russia sepaitemi mezüing Ukraine amakba anogo nung iba yimti amak.

Deputy CM Y Patton-i lenisüba kübok tesüba küm asem tsüingda NPS cadre review inyakogo aser district tasentem nung SP rank officers tasen shimogo, ta pai ashi.

"Ministry of External Affairs indang teshimtet telok ka Hombarnü Moldova linük atongtsü" ta Deobarnü External affairs minister S Jaishankar-i shia liasü.

"India sorkari mezüing sangdong agütsüba sülen India nung nung 8,000 shi kati Ukraine toktsür tanga linüktemi ogo" ta paisa shisem.

External affairs minister Jaishankar-i Moldova foreign minister den phone ajanga Ukraine-Moldova arrtsülen anendaka aliba India nung yaritsü mepishi.

Ukraine nungi India nung anir mapa dang Operation Ganga ta ajar aser iba mission kübok tayimtsü trok tashi nung senso 1,396 anir aruogo, ta Bagchi-i metetdaksü.

Ukraine nung Nagatsür kaketshir Moldova tongogo

Dimapur, February 28, 2022 (TYO): Odessa National Medical University nung azünger Naga tsür L. Amenla Hombarnep 6:00 ako meta Moldova linük tongogo.

sasa sen saruteper gari ka anepalua Moldova-i aotsü apusoa liasü ta tebei ashi.

La ya Waromung nung Wb. Lanu Aier'er jala lir aser Kuda village, Dimapur nung alir.

"Ozü jala Ukraine toktsür Moldova linük atongba osang angashia temolung terabo anisungzüker saka la ki tonga maru tashi mesüingjemeteter" ta Amenla tebuisa ashi.

Tanü nikongdang Amenla tebu dangi oa la indang osang metetpeladang la tanep Moldova atongba osang ashi.

L. Amenla ya 2017 nungi Odessa National Medical University nung azünger aser taküm ya la tazingba nung final year lir.

Deobar nikongdang Odessa nung Amenla dena kaketshir kar pei

District Hospital Dimapur nung Covid-19 hospital lapok

Dimapur, February 28, 2022 (TYO): Health & Family Welfare Minister, S. Pangnyu Phom-i Hombarnü District Hospital Dimapur nung yipden 50 aliba Covid-19 hospital ka lapoktsüogo.

tajungba agütsüsü atema sorkar aser Department yaritepa Zunheboto, Noklak aser Longleng district tem nung districts hospitals buildings tasen yanglutsü, ta paisa ashi.

"Nübortem nungdakba facility rongnung mozü ki ya ka lir aser advanced equipment adenba ajanga iba mozü ki ajanga mapang shitak nung shirangertem anepalutetsü" ta Minister Pangnyu-i ashi.

"Novo Nordisk Foundation, Embassy of Denmark, New Delhi, C-CAMP Bengaluru aser Office of the Principal Scientific Adviser to Government of India lenisüba kübok AGNli Mission ajanga Invest India ajanga iba mozü ki yanglutsü" ta Director Health Services, Dr. K. Vikato Kinimi-i ashi.

Alima ajungalen inyakba ama Nagaland nunga küm asem tashi Covid-19 wara anema rarayonga arur, ta pai ashi.

"Iba mozü ki ajanga Nagaland nung alirtem yaritsü aser kiojen jungjunga anepalutsü" ta Dr. K. Vikato-isa nangzük.

"Novo Nordisk Foundation-i mozü ki tajung agütsüba atema pelar aser külen Principal Scientific Adviser to the Government of India-i iba mapatong inyaktsü atema Dimapur district shimba atema tenüsang agütsür" ta Pangnyu-i metetdaksü.

"Dimapur ya shishilembadak tongti tesem ka lir aser nütsüing yongsük aika lir. Covid wara mapang Dimapur nung khuret tulu ajuru saka sorkar teyari agia administration-i wara aziüoktet" ta

Dimapur Deputy Commissioner, Rajesh Soundararajan-ia metetdaksü.

Paisa Novo Nordisk Foundation dang pelaba metetdaksü aser tarutsü nunga parnok teyari maneni nungdakba olen ka lemsatep.

Iba sentong nung His Excellency Ambassador, Royal Danish Embassy, New Delhi, Freddy Svane; Counsellor Innovation, Royal Danish Embassy, New Delhi, Jakob William Oerberg; Chief Technology Officer, Office of the Principal Scientific Adviser to Government of India, Mudit Naryan aser Uttam Bhattacharyya nungertemia o jembii.

Sentong nung mendenji Chief Medical Officer Dimapur, Dr. I. Moatemjen liasü aser Medical Superintendent, District Hospital Dimapur, Dr. Khrielasanuo-i anküp tepela o jembii.

Dept. of Soil & Water Conservation ajanga Director den tepila sentong agi



Department of Soil & Water Conservation nung Director, K. Zhekheto Awomi, Tiamongba, Mechanic Gr. II aser Pungore, Peon nungertem den tepila sentong February 28, 2022 nü agidang tangokba noksa nung angur.

Dimapur, Tsüklai/Feb. 28 (TYO): Department of Soil & Water Conservation ajanga par Director, K. Zhekheto Awomi den Tiamongba, Mechanic Gr. II aser Pungore, Peon nungertem den tepila sentong ka February 28, 2022 nü ayongzüka agia liasü.

Iba sentong ya Directorate office indang Conference Hall nung agia liasü. Joint Director, Lipokmar Yaden-i sarasadema sentong tenzük aser Neizokhono, Registrar ajanga akhi mapang bilemteta jembiba mapang Director menden nungi anisüngzüksangi maparen balala inyakba indang bilemteta jembia liasü.

Iba sülen Director menden nungi anisüngzüksang aser staff

tem nem tepela temaitsü kulizüing kaket agüja liasü.

K. Zhekheto Awomi ajanga sentong nung jembiba mapang pa wadang nung ajangshibatem bilemteta jembi aser pelaba lemsatapa liasü.

Sorkar tenzük kahi kechi jenjang nung südir süaka nendaka inyaksüla, kechiaser ka medemi kai junga meinyaket, ta pai ashi.

Pai Department dang tajungtiba nung temolung ajak agi inyaka tejakleni aotsü ajungshia liasü.

Iba sülen Secretary to the Govt. of Nagaland, K Libanthung Lotha, IAS ajanga o tatsüka jembiba mapang outgoing Director-i kanga jeret-pereta aser temolung agüja

inyakba atema tenügsang agütsü.

Mapa nungi anisüngzüksü mapang tonga aser iba ama sentong nung tongtettsüsa arishia aliba ya takum nung temoatsü tulutiba lir, ta pai ashi.

Pai outgoing Director aser staff tem dang tepela nung anisüngzüka alitsü moatsü.

Sentong nung Project Director, SK Hekshe-i jembiba mapang outgoing Director lenisüba nung takok balala anguba indang tushia jembi aser ano tanünga staff tem dang kasa yinya amshitsü ajungshia liasü.

Iba sentong nung Joint Director Denis Angami menden liasü aser Z Amenba Ao, Deputy Director ajanga melepzüng o jembia liasü.

March 12 nü 1st Quarterly National Lok Adalat alitsü

Kohima, Tsüklai/Feb. 28 (TYO): National Legal Services Authority (NALSA) kübok Nagaland State Legal Services Authority (NSLSA) ajanga district headquarters ajunga nung March 12, 2022 nü 1st Quarterly National Lok Adalat (People's Courts) amentsü.

Ibai 2022-2023 atema 1st Quarterly National Lok Adalat alitsü.

District Legal Services Authority (DLSAs) temi District Court telungzük nung Lok Adalat Benches 11 amenoktsü.

Lok Adalat ya mangatetep aliba ken o jembiba maparen ka lir, aser iba ya ajanga court nung mejembi bendena aliba mesüra 'pre-litigation stage' nung aliba tem jembir aser angateteper.

National Lok Adalat ya quarterly basis nung agir aser iba ya ajanga state tesem ajungalen mangatetep aliba ken o balala senotsü meindoki angateteper.


Civil, matrimonial, MACT aser tila-teri aibelenba indang mangatetep-ken o alirtemi iba anogo matongdang mesüra iba anogo DLSA front offices,

District Court building aser NSLSA member Secretary Office, DC Office Compound tongtsütsüla mesüra 0370-2290153 nung tongteprateptsüla mesüra nlsa.nagaland@gov.in nung email asütsü akok.

DLSA shia nung ken o jembiba data ya NSLSA indang web portal nlsa.nagalandgov.in nung agütsütsü.

State nung December 11 nü 4th Quarterly National Lok Adalat aliba mapang ken o 736 aliba nungi 212 tembanga jembia liasü aser item ken o ya sen 3,08,64,322 indang liasü.

Dept. of Health & Family Welfare nung Mission Director den tepila sentong agi



Dimapur, Tsüklai/Feb. 28 (TYO): Department of Health & Family Welfare ajanga Dr. I Talitemsula Jamir, Mission Director NHM nem akum agüja tepila sentong ka IDSP Hall nung February 28, 2022 nü ayongzüka agia liasü. Iba sentong nung Dr. Thorhusie Katiry, Director (FW) menden liasü.

Sentong nung Principal Director, Dr. Neikhrielie Khimiao-i jembiba mapang Dr. Talitemsula ajanga Department aser NHM nung shilem tajung

agiba atema tenügsang agüja liasü.

La ya bendanga agütsüba ketdangsrü ka liasü aser Centre den senden balala amenba mapang State tenung nung lai aiben shilem tajung agia liasü, ta ashi.

Directorate nung külemi maparen balala inyaba indang bilemteta jembiba mapang, la ya tasü tait aser la dak telemtetba tajung agitetba sempet lir, lenir asütsü sempet lir aser tashidak wara tenzükba mapanga lai

shilem tulu agiogo, ta Principal Director-i ashi.

Dr. I Talitemsula Jamir-i iba sentong nung jembiba mapang sentong nung adener ajak dang pelaba lemsatapa liasü.

Anema lia iba jenjang tongtetba atema lai Tsüngrem nem tenügsang agütsü aser lar kibongi tanen makai nungitba atema pelaba lemsatapa liasü.

Laisa Department nung ketdangsrütemi anir staff ajunga dang meranga inyaksü ayongzüka liasü.

Addl. Chief Electoral Officer, N Moa Aier den tepila sentong agi

Dimapur, Tsüklai/Feb. 28 (TYO): Additional Chief Electoral Officer, Nagaland menden nungi anisüngzüksang, N Moa Aier atema tepila sentong ka D-Block Panchayat Hall, Kohima nung February 28, 2022 nü ayongzüka liasü.

Iba sentong nung Ruokuovituo Khezhe, Joint CEO menden liasü.

Sivilhou Mor, Superintendent ajanga Lai zünga sarasadem aser IT Cell, CEO Office ajanga temeja ken ka aten aser mapa nungi anisüngzüksang indang video ya sayua liasü.

Chief Electoral Officer, V. Shashank Shekhar, IAS ajanga mapa nungi anisüngzüksang den salem lemsatep aser pa den külemi inyakba mapang ajangshibatem lemsatapa liasü.

Pa dak jeret-peret aser amalitet sempet tajung aliba ngua janratema inyakogo. Pa mapa ajanga nüburtem asoshi tajung jenti inyaktüsügo, koba pela alitsü tetenzükdak lir, ta Shashank Shekhar-i ashi.

Pa takum tajung nung mapa

nungi anisüngzüksang ya tepelatsü lir aser ano pai lokti asoshi mapa tajung inyaktetsü. Sorkar mapa inyaker indang kinunger temia tongti shilem agia arur, ta CEO ajanga ashi.

Additional Chief Electoral Officer menden nungi anisüngzüksang, N Moa Aier-i tepila o jembiba mapang, Election Department nung küm 33 dak tema tenzükba arugo, ta ashi.

Pa service nung alidang tajangshiba balala ajuruogo aser temolung ajak agi bendanga agütsür inyakogo, ta ashi.

Külem tenzük aser par kibongi tanen makai yariba atema pai pelaba lemsatapa liasü.

Sentong nung Awa Lorin, Deputy CEO; Alila Chang, Assistant CEO aser Kedolhourieno, Superintendent nunger temia o tatsütsü jembia liasü.

Maneni Mhathung, Deputy CEO ajanga melepzüng o jembir sarasadema sentong tembanga liasü.

Tetsü Oshiji kibong tekülem sentep nungi tenzük: Aso Imsong



Aso Imsong

tarok, ola osü tajung, kenten tetetzü tarok, yimyim ola taret aser tesangtem, nungja-koja tajung aser ano aika lir, asenoki itemji bushitetra asenoki asen tetsü oshiji tabensaba nung takara ta metettsü, anungji asenok asen tetsü oshi nung temolung agütsütsü merangti, ta Aso Imsong-isa ajungshia ashi.

Asen tetsü oshi nung nungja-koja tajung aika lir, saka itemji asenoki majaba agi masü pi oshi agi ajaba agi asen nungja tenunggi samaodaktsür. Anungji asenok asen nungja tajung akaba ajakji ajatsü mesüra jatsütsü kanga tongtipang ta tongti O jembir-isa shisem.

Paisa, Tenla ki sabangji tetsü oshi renloktsü asoshi tetemsü sabang ka lir, kechiaser ajemajema mener anga-a alidang tetsü oshi taret jembira aji angaoka temolung nung ayuba ji kodanga mamatsü, anungji tenla ki sabang nung O jembir temi Tsüngrem O den tetsü oshi temeja jembitsü nungdaker, ta amangba pur ajungshia ashi.

Aso Imsong-isa, tila tanur aser lanurtem asoshi tetsü oshi angazükdakji tila tanur sentep (child) aser Deobar school (Sunday School) takdang lir, anungji tila tanur aser Deobar school tesayurtemia iba ya angateta tanurtemji mesüzüka Tsüngrem O denji külemi tetsü oshi angatetdaksütsüla, ta arua alir tesayurtem ayongzüka shisem.

Iba sentong nung Tsüngrem leniba jazüka S.Panger-i sarasadem, Imtjungla ajanga Tar nunger otsü ka ashi aser Imdangjungla-ia tetsü-tebu ken ka tena liasü.

Sentong nungsa Temjenlong-i Ao oshi nung ita 12 nungja zünga ashi, iba sentong ya Moaakum Lkr-i ketdangsüa ani, aser sentep tembanga teloki tenügsang agüja sarasadema liasü.

Dimapur, Tsüklai/Feb. 28 (TYO): Kin ka takum lidaktsütsü asoshi tongtoretji tetsü oshi lir. Tetsü oshi meimtsüji kibong nungi tenzükla. "Asen tetsü Ao oshiji kibong tekülem sentep nungi tenzüksüla, kibong tekülem agidang kibong nung alir ajaki Lai tekong kaka azüngba, osangtajung ken kakat nung ken atenba aser Tsüngrem O lemsatpeba ajanga kibong nung kati ka nungi angazüktepa tenzükbaji temoatsü tulutiba asütsü, ta Aso Imsong-i Deobar anogo Alisüngküm Baptist Fellowship nung tetsü oshi anogo nungtem sentep nung jembidang ashi.

Tsüngrem akümstüba kibong nung tetsü oshi jembia kibong tekülem sentep agira Tsüngremi kibong moatsüba den külemi asen nem asen tetsü oshi angatetetsü Tsüngremi shisatsü agütsütsü aser ibaji asen tetsü oshi züina aoba nung nukmen tongtipang ka asütsü, ta paisa ashi.

Asen nüburtemi aiben asen Ao oshi ya sensaker ta pangpet süa jembir aser asen tetsü oshi ya sensaker ama bilemer, saka asen Ao tetsü oshi ya sensaker masü. Asenoki yimbazüa dang bilemba, jembiba aser mebushiba agi asen tetsü oshi sensaker ama bilemer, ta pai ashi.

Asen tetsü oshi nung tetetzü

Union Minister Sonowal-i Majuli nung nüboyimtsür



Hombarnü Union Minister of Ports, Shipping & Waterways and Ayush, Sarbananda Sonowal-i Majuli nung BJP candidate Bhuban Gam atema nüboyimba sentong nung tangokba noksa nung angur.

Majuli, February 27, 2022

(Agencies): Hombarnü Union Minister of Ports, Shipping & Waterways and Ayush Sarbananda Sonowal-i Majuli nung BJP candidate Bhuban Gam atema nüboyimtsüogo.

March 7 nung Majuli by-election agitsü. Iba menden ya taoba chief minister aser Union Minister Sonowal-i toktsüba sülen tazüing aküm.

"Majuli nungertemi BJP agizükba, pusemba aser moatsüba ajanga BJP-i iba asetkong district bendanga agüja yariri" ta tanü Karatipar nung lokti sentong ka nung Sonowal-i ashi.

"Onoki Majuli ya world site ka kümdaktsünüba tera ayanger. Ni Assam CM inyakdang nübortem den amalitepa inyakba ajanga Majuli nung süngiang atanger. Tanü Majuliare nung alirtemi

Parivartan kuli asür" ta Union Minister-isa metetdaksü.

"Prime Minister Narendra Modi-i nungitba ajanga Assam aser North East tejakleni aoer. Iba nung Majuli nung alirtem dena lir. CM Dr. Himanta Biswa Sarma-i terenlok atema temolung agütsür aser iba ajanga Assam-i India nung tenüing tajung angutsü. Onoki Assam ya India nung state tajungtiba kümdaktsünür. Iba alizüing atongsü atema asenok ajaki meranga inyaktsüla aser sorkari agütsüba scheme ajak timi inyaktsüla" ta paisa ashi.

"BJP sorkari Majuli renlokaktsüsü atema mapa aika inyaker. Jorhat- Majuli bridge, Lakhimpur tashi connectivity mapatem iba nung dena lir. PM Narendra Modi-i yaria Majuli meketa ring road ka yanglutsü atema Rs 1700 crore lezmüktsüogo.

Külen, ADB-ia Majuli renloksü atema Rs 339 crore lezmüktsüogo" ta Sonowal-isa metetdaksü.

"Majuli ya Assam nung district tajungtiba akümstsü lenmang lir. Bhuban Gamy a nenoki kanga junga meteta nisung ka lir aser pai teti Majuli nung den dena aruogo. Nenok ajaki Bhuban Gam nem vote enoktsüsü ayongzüker. BJP-i dang nübortem tenzüker. PM Narendra Modi lenisüba kübok India ya alima lennir ka akümer" ta pai ashi.

Iba sentong nung Assam Minister Pijush Hazarika, MP Pradan Baruah, MLA Manab Deka, MLA Naba Kumar Doley, MLA Sanmilita Gana shakti Asom President Ranjit Doley, AGP Majuli District President Phanidhar Tahu, karyakartas aser nisung aika aden.

Assam sorkari Ukraine nung anendaka alir atema helpline lapoktsür



Feb. 27, 2022 nü Assam nung lanur par pezü Ukraine nungi New Delhi tonga arudang tanokba noksa nung angur.

Guwahati, February 28, 2022

(Agencies): Rara adoka aliba Ukraine linük nung anendaka alir tanga India nung densema Assam nung kaketshir 10 shi anitetogo aser parnok tayimtsü balala nung New Delhi aser Mumbai tongogo.'

State nungi Ukraine nung anendaka alirtem timtem kecha melii Ukraine nungi parnok anitettsü asoshi Ministry of External Affairs den külemi maneni inyakdar, ta Assam sorkari ashi.

Rara agi teraksa tulu adokdaksür aliba Ukraine nung anendaka alirtem atema administration-isa WhatsApp number tem aser email ids den web link agüja lir. Pei talidaki

meypa arutsü asoshi item helpline ajanga tekolakpurtem den tongteprateptsü akok.

Deobarnü Mumbai aser New Delhi kübok Assam Bhavan nung ketdangsürtemi kaketshirtem agizük aser parnok pei talidaki yoktsü asoshi nüngdakba maparen achaayangdar, ta state sorkari yashi metetdakja liasü.

Ukraine nungi aruba kaketshir 10 nungi kaketshir anabo Mumbai tonga aruogo aser tangatem New Delhi tongogo.

"Parnok meypa arutsü atema Assam sorkari ticket anepalutsüogo" ta sorkarisa shisem.

Kaketshir terprongla Ukraine

nung University aser College balala nung zünga liasü.

"Kaketshir 10 rongnung, kaketshir kar Guwahati tongogo. Kasa mapang tangartem state tonga anir arutsü asoshi maparen achaayangdar" ta Hombarnü ketdangsür kati ashi.

Chief Minister Himanta Biswa Sarma-i ashiba agi, item kaketshir state tonga anir arutsü asoshi sorkari akok tashi ajak inyaktsü.

Russia-i Ukraine amakba mapang Honibarnü India sorkari anendaka alir külem sensotem anitettsü asoshi maparen tenzüko. Bucharest nungi Mumbai tashi mezüing charter flight nung India nung 219 shi anir aruogo.

February 24 anepdang Russia miktartemi Ukraine amakba mapang nungi civil aircraft maparen atema Ukrainian airspace shibangtsüogo.

Tang Assam nungi kaketshir 100 dak tema Ukraine tesem balala nung anendaka lir, ta asadangtetter.

Deobarnü, Foreign Secretary Harsh Vardhan Shringla-i ashiba agi, India-i Ukraine nungi sensopur 2,000 shi anitetogo aser; Hungary aser Romania nungi chartered flight nung nisung 1,000 shi India anir aruogo.

Manipur election duty nung police ka khaset

Imphal, February 28, 2022

(Agencies): Hombarnü Manipur state kübok Assembly constituency 38 atema mezüingbuba polling shilem agiba mapang state police kati bena aliba prangpong nungi memeteti injang khatoka asü.

Iba nisung ya Naorem Ibochouba ta jangjaogo aser Churachandpur district kübok Tipaimukh assembly constituency nung polling

asüdak pa duty nung liasü, ta ketdangsür kati ashi. Ibochouba ya Kakching district nungi liasü.

Police Naorem Ibochouba asüba osang angashia mangyimer ta Chief Electoral Officer (CEO) Rajesh Agarwal-i ashi.

Imphal tashi pa mang tayimtsü ajanga bener ao aser pa mang autopsy atema state hospital-i yok, ta Rajesh-i ashi.

Gauhati HC-i Assam sorkar dang CAA anema lungkak aيتدang khaseterem osang meshir

Guwahati, February 28, 2022

(Agencies): December 12, 2019 nü Citizenship Amendment Act (CAA) anema lungkak aيتدang nisung 5 tepsetba atema hopta asem tsüingda osang tejangja agüjang ta Gauhati High Court-i Assam sorkar dang shiogo.

Gauhati High Court-i Scholar Dr. Hiren Gohian aser writer-social activist Paresh Malakar nati benokba petition ka angadangdang iba tetuyuba agütsü.

Chief Justice Sudhanshu Dhulia aser Justice Soumitra Saikia na adenba division bench ajanga Commissioner Secretary, Home and Political department dang hopta asem tsüingda osang tejangja agütsüsü mapang atakzüksü.

Division bench-isa Assam DGP, Commissioner of Police Guwahati aser DC, Kamrup (Metro) district nem osang agütsüogo.

Citizenship Amendment Act anema lungkak aيتدang nisung pungu tepsetba atema

independent judicial inquiry ka asütsüla ta Dr. Gohain aser Malakar nati petition nung shia lir.

"Iba mapang nübortemi timi dang lungkak ait aser nisung teimbaka süsubongertem dang liasü, saka police aser armed forces personnel-i kümdangtsü osang kecha mesangoktsü dang injang khaloktsü. Iba ya parnoki jelia tasa atonger inyakba ama ajiteter, anungji iba Court-i tebang aitsüla ta onoki bilemer" ta tenatasa ashi.

"Supreme Court-ia nisung asüba shia indang bushisüingdang balala asütsüla ta shiogo" ta Dr. Gohain aser Malakar nati petition nung shia lir.

Dr. Gohain aser Malakar tenüing nung Advocate Vikram Rajkhowai-i okadak jembü. GHC-i iba ken o March 23 nü maneni angadangtsü anogo latetogo.

December 12, 2019 nü CAA anema lungkak aيتدang Sam Stafford, Abdul Amin, Dipanjil Das, Ishwar Nayak aser Azizur Rahman nungter khaset.

Meghalaya: Rakesh Sangma-i GHADC CEM nungi anener

Shillong, February 28, 2022

(Agencies): Meghalaya kübok Garo Hills nung Rakesh A Sangma-i Garo Hills Autonomous District Council (GHADC) indang chief executive member (CEM) mapa nungi anenogo.

Deobar aonung GHADC CEM Rakesh Sangma-i pa mapa nungi anenba shidi (resignation letter) Meghalaya Angh Satya Pal Malik nem agüja liasü.

Meghalaya nung GHADC indang Deputy CEM, Albinush R Marak-i CEM ama Rakesh

Sangma melenzüksü akok.

Rakesh Sangma ya GHADC CEM mapa nungi agentsü asoshi Garo Hills districts nung nübur aikati takhangba agüja longkak ait.

GHADC indang CEM ama Rakesh Sangma shimba anema Garo Hills nung amenoka alir 'pressure group' balalai tesüiba hopta ishika nungi longkak aitogo.

Item pressure group' yagi Rakesh Sangma ya Garo kin nungi ta asüba ya tarendaktsüka ta temolung melemer bilemer.

Centre-i Ukraine nungi Meghalaya kaketshirtem anir arutsü: CM Sangma

Shillong, February 28, 2022

(Agencies): Ukraine nung anendaka aliba Meghalaya kaketshirtem Centre-i yaritsü nangzükogo ta Meghalaya Chief Minister Conrad Sangma-i metetdaksü.

"Ukraine nung anendaka aliba Meghalaya nungter kaketshirtem tenüing Foreign Sect GOI nem agütsüogo. Pai teyari agütsüsü nangzükogo" ta Meghalaya Chief Minister-i ashi.

Ukraine aser Russia tsüingda raraba mapang India sorkari India sensotem linüki

meypa arutsü atema yariteptsü asoshi 24X7 hour control centres metetdaksüogo.

Külen, Prime Minister Narendra Modi-ia Deobarnü Ukraine tensa atema jenjang temaba nug senden ka ayonga menogo.

Russia-i Ukraine amakba sülen kaketshir teimba ser India nungter aika Ukraine nung anendaka lir. India sorkari parnoki anir arutsü atema mapa tenzüko aser February 26 nungi tenzüka nisung 900 tema anir aruogo.



TIR YIMYIM YIMOBILEM (EDITORIAL)

DIMAPUR SANGTENNÜ, METSÜREMI (MARCH) 01, 2022

Pei tetsü tasoli asoshi

Tongpang nung nokdaksüba nübo aser anüng, ali aser tzüym nung raratsüba tayimtsü, rong aser raraba hadir akaba nung Russia o Ukraine na medemdangteptsüla masü, anüng o ali na, Russia noklangben agia tashi taitba saka Ukraine tir Wb.Volodymyr Zelensky-i anir Ukraine nunger tetsür teburtem tongpang nung tasü itta nokdakbaji asenok asoshia tayongzükba tuluka asütsü. Russia-i parnok meyong tayimtsü aser rong aika raksatsüogo aser sepaitem alidak tesem aika makdoktsüogo aser joko Ukraine yimtiba Kyiv aser Kharkiv yimtitem tashi Russia sepaitemi atsünga aita par yimti yimdong nung tsükchirtem den khatemper, ajisüaka Ukraine tir Zelensky-i Russia tsüngdang mapudaker aser par lima toktsür-a mao ser, pa-ang arürkhudong kümer tongpang nung nokdaka lir. Iba jagi paji rongsen aser yimsüsüba menden penbuba yimsüsür aser tanishir masü saka pei tasoli meimba senso ta jangjar. Pai pei tetsü taso lima asoshi pa taküm agütsütsü mulunga lir. Atangji, pai NATO telongjem nung dena aliba US aser tanga kintem nungi Russia-i injang yok meyok ka jet ta aruagi pa pu asemtsü ta bilem, saka NATO nung aliba kintemi Russia den rongsen lenmang nung pilaba dak alaka shingaia teka meytet. Iba ama takok angutsü teimla maliba tongpang ka nung nokdaka lia, US-i Zelensky dang Ukraine toktsür US-i arutsü atema tayimtsü yokdi ta ashidang, " ni tang tayimtsü nung kazüa senzüdang masü, saka nenokang aruagi yaridaksüner," ta ashiba o ji pei taküm aser kibong dang nungibo pei tetsü tasolima temeimba meimba shisatsü atenba mulungjang nungi adokba teburchi o ka liasü. Ashiko, asenokibo US-i ashi mashi ka, asen nübortem toktsür kibong ajak anir US nungjiang oa jenokla. Tang Israel nungertemi tiyongi irr jembitsüba agi, Russia o Ukraine na Belarus arrtsülen ajurutepa yimjung ken o süoka jembidagi, ajisüaka Putin o Zelensky na pronglai telemtetba tajung kati arutsübo meimlar, anungji tenapronglai pei sepaitem dang tensa tamajungba ka asoshiang renema atatsü metetdakja lir. Atangji, Ukraine nungertem ya pei tetsü tasoli meimba nübortem lir, ibayongjiang par sepai katibo pei mang agi bomb kümer Russia nunger nokdangtsü atema apu ka nung nokdaka yur apuji pa mang agi poksadaksü. Nisung kati iba tashijiang pei tasoli asoshi pei taküm bendanga agütsütetsü. Itemji dang masü saka ano asenok asoshi pei tetsü tasoli asoshi bendanga agüja inyaksü atema angazüktsüsa tang Ukraine nung atalokba kaji, Russia nungertemi yimti tashi tonga aruagi makyonga aruba agi tetsübu nung nübortem meyririjang aika pei ki toktsür kidanger limatem nung tejenokdak bushia jena aoba mapang ka, Ukraine nunger tanga limatem alir aika pei lima asoshi raraba tongpang nung shilem agitsü asoshi meyipa arur. Item rongnungji teburtem dang masü saka tetsürtema aika lir. Parnoki tasütsü metsübur saka pei lima asoshi asütsübjiang jangratema bilemer. Ukraine kidanger Poland lima artsü nung süngküm anüker sepaitemi ashiba agi, Russia-i Ukraine amaktsü tenzükli nungi Ukraine nunger tanga limatem nung alirtem pei tasoli asoshi raratsü atema Poland arrtsü tonga arurtem meyririjang 22 shi liasü aser ano aika tarensena nokdaker par limai ayaoka aitsüba purtem liasü. Item jagi, "ozü lima asoshi onoki merarara shirnoki raratsütsü," ta shia pei lima bushia aoer. Item denji asenok nübortem madak yimsüsür, ketdangser aser linük tenzükertem jakla aser mapatem medemdangra, kanga bilemdangtsüsa adoker. Asenoka yamai pei tetsü tasoli tenzükba tenüng atemer, pei agitsü rongsen rongsen bendena alidang, tangar tsükchirtemi asen lima makyonga arununga koma süla (?) ta bilemdangdi. Ashiko, asenokibo tsükchirtemi injang yok meyok ka teka mekangtsü südi ta bilemer, kechiyong asenokibo asen tetsü tasoli akhüm aser temeten dang nungibo rongsen temeimba meimer. Tanü putu nung asen tetsü tasoli nung nübortem asoshi inyakba tenüng atemer asenoki tashiyim agi saru saruba yagi, commission agiba yagi aser percentage meshiba yagi, shitakba tsükchir ket nungi asen lima kümzüktsü na (?) ta asensasa shisadangtsüba mapangji tang ya lir.

OLEMSABANG

AO OSHI RENLOKTSÜ ATEM MAPA KÜMA INYAKTETSÜ MERA KAR

- Tiatoshi Longkumer (KABA)

Kechiba tanü putu nung asen Ao lanu asensortemi Nagamese jembitsü yamai jangrar? Junga reprangdangra, Ao lanurtemi English-bo onsarabo mejembir, saka Nagamese-bo kibok nunga aser kima nunga jembitsü kanga sabur, aser Nagamese/English jembidang Ao ojangtem kar aon nung metsü enoker ama tera-ra enoka amshir.

Ao kini Nagamese yamai jembitsü sabuba ya, asen kini tanga kin mesüra oshi balala jembir telok den junga libalirotsü bilemba shisatsü ka nungi adoker asü mesüra asenok tangar kin dang nungi shisatsü tesademba asüba agi tangar yayim bushia oa "teyongtsü oshi" (a neutral dialect) Nagamese ya jembir? Reprangdangra, Naga kin rongnung asen Ao kin-i tanga Naga kin aser tanga kintem den kiba-lenbua aliba ya teimtiba lir, aser ano teimba renloka odar. Angazükba agi, Kohima town anasa aliba Angami yimtsüng kar nungbo parnok yimer tetsür jubilee nung town nung alir tetsür telok longjemmer ken atandang, asen Aotsürang teimba dener ken atenba shia liasü. Aji oda, oshi balala jembir külem kibong ka kümer aliba kibongtem nung Nagamese/English ang jembir.

Saka asen lisopurtem jenjang nungi bilemdangra, pei tetsü oshi toktsür bendanger oshi ka angateteptsü mechi nung tongti süa jembiba jagi pei ayak/maitsü jenjang ajak tepseter ta angatetdi. Anungji, oshi balala jembir kibok nung akok tashi oshi anaprongla jembitsüla aser tiyongtsü oshi, Nagamese ya kilong nungibo merüptoktsüla. Asen jala-jabasotemi Naga nunger oshi ana jembitetbaji koda senti aser tashi tulu lir. Iba ama tatishtitsü süa amshitetsü kibong asen Aor lenir rongnunga lir. Anungji, item tatishtitsü kibongtem nungi angazüka tanungbatemia merangtsü koda tongtibang.

Asen Aortemi oshi ana jembir - Chungli aser Mongsen. Ano telok tila kati Changki oshi jembir. Chungli, mongsen aser changki oshi asem nungji kabosa nisung shia pei tetsü oshi lir. Saka asen kin dangi American missionarytem arudang parnok chungli o jembir yimtak tama atong nung joko iba mapang nungjagi tenzüka chungliji asen Ao kin asoshi sabang nung amshiba oshi aküm aser tanü tashi chungli o-ji zülü-panglu aser lokti sentep-senden ajak nung jembiba oshi lir. Tangar kin danga iba oshi ya sayu aser kaketshirtemi-a iba oshi nung zünga tatidang agütsür.

Tanü asen Aotsür-Aor rongnung oshi-oben len tebilemstü kaji aikati Mongsen mesüra Changki-bo junga jembiteter saka Chungli-bo junga mejembiteter ta asüba ya lir. Tanü lanu asensortem asoshi dang masü tsüraburtem-a dena iba ya tebilemstü tulu lir. Mongsen aser Engraji nung abensa jembitetakasa, chungli o nung junga mejembitetba ajanga aikati lokti sabang nung shilem magili ta asübapur jenti lir. Mongsener chanu ka ama chungli jembitsü ano mangazükdang koda timtim ajuru iba indang Dr. Wati Longchar-i pa taküm nung ajurushiba nungi lemsatempa liasü.

Dr. Wati mongsen temeja jembiba yim ka nung soa yintet. Anungji tenlakidang chungli jembia angashiba dak alaka par kidang kodanga chungli mejembidang. Pa Alongkima Govt. high school nung chungli jembir kar school nung ajuruba ajanga chungli ojang kar jembia tenzük. Item ojangtemjia temulung nung kanga shisadanger angsa chungli denji jembia pa shia liasü. Saka chungli tera jembitetbaji kanga dang jenjang tulu ta agi. Aji oda, tamalenbo asen tsüraburtemi mungdangi aotsü aser arogo nung tenzük mapa inyaksü atema chungli agi sarasadem asütsü masüngdangtsü ta pastorbai nangzük nungang agizük ta asüba otsü lir. Yamaji Ao oshi dang sür nung chungli junga mashiba/mejembitetba ajanga Mongsener aikati lokti sabang nung shilem junga magitedi aliba ya koda tajungba küma renlokdahtsütsü? Iba sendak nung mapa küma inyaktetsüba mera tajung kar bushitsüla.

"Aori Tsüngrem dang pelatsüba kaji asenoki oshi ana jembir aser anapronglaji 95%-i angateteper" ta Rev. Bendangmeren-i shia liasü. Paisa ashir, "Oshi anapronglaji kanga jenjang balala nung tetezü tarok. Karbo chungli oshi agi merajamtetba Mongsen oshi agi rajemteter. Ano karbo mongsen o dang nungi chungli oshiji tarokba lir. asenoki lokti nung sayutsüngidang chungli aser mongsen oshi agi jembidang tetsüdaktsü alidang chungli oshi nung lira aji amshitsüla. Saka yakta dang engraji oshi amshir...[Atangji] Ao oshi ana rongnungji ka junga jembitetra aji teperi ta nibo bilemer." Rev. Bendang tangatetbaji, Aor lokti sabang nung jembidang chungli aser mongsena meyoktepa dang mashibaji ang shisatsü tarokba nung lemsatepteter aser ajiang jenjang tuluba lir. Tesüba putu nunga, Aor arogo aser mungdang lenir tsürabur Rev. Riküm nungeri Mongsener arogotem nungbo Mongsen temeja agi dang sayutsüngiba aser sarasademba khuli tejangja lir. Aser yamaji yimtak alirtemia Mongsen o agi jembibajiang tain-tanur ajaki tzüra tatemala angaba otsütem lir.

Rev. Bendang-i Chungli aser Mongsen meyoktepa amshiba yim-lenji atsünga Dr. Wati Longchar-ia yamai shia liasü, "Mongsener tsüraburi Chungli-Mongsen anaprongla meyoktepa kibong tekülem nung amshitet nung koda jungla ta bilemer." Dr. Wati-i shishemba ama, Ao oshi angazükdakji Sunday school aser tenlaki dang masü saka tongtibangba tesemjibo kibok/kibong ya lir. Aser kibong nung kidang alir jembishinüadang aser kibok tekülem mapang agidang pei oshi agi jembitsü koda tongtipang. Kibok nung tsüraburi anir Ao oshi - chunglia aser mongsena- tsüraburi anir jembia nung dang tanuri angazüka jembitettsü. Pastor Imnatoshi, DABA aser Dr. Sentiwate tenapronglai tanurtemi pei oshi mashiba teraji tsürabur lir ta lemsatempa liasü. Pastor Toshi Longkümer yamai ashi, "Ao oshi jembitsüji tsürabur shilem ta onük ka jembia nung Ao oshi mashiba tanur indang tsürabur aika angazükba agi pei tanuri Ao oshiji tejembi ta asüyonga odang jembitsü südi ta bilemer. Anungji tanur masü tsürabur sayu tajungba ta bilemer."

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Watiyim B/Arogonung ABAM Social Concern sensitization sentong agi



Mokokchung, February 28 (TYO): ABAM Social Concern sensitization sentong maneni Watiyim Baptist Arogonung Febuary 28, 2022 anogo kanga takok ngua agiogo; iba sentong nung Watiyim Baptist Arogonungi tenzükertem, yimten aser telen balala nungi lenirtem arua aden, ta Executive Secretary, ABAM, Rev. Dr. Mar Pongener-i sangdong ka nung metetdaksü.

Ajak agi lenirtem 25 shi arua dena liasü. Iba sentong nung tanü rongdak

tebilemtsütem jembia liasü. Tanü Watiyim Yimten aser Arogon longjemer yimtsüng süngjema ayutsü asoshi mapa jenti inyaka aruba atema kanga pelar, maneni rangben taneptsü angutsü nükla nung inyaka aodang Arogon aser Yimten tangatetep aser telungjem nung inyaksü nungdak ta nenshia sensaksem aka. Arogon aser Yimten ya apuani ama lir, anungji telok ana ya külemi teka amteper inyak nung dang tanü taginüba takok angutsü ta jembi.

Iba takok angutsü asoshi

küm nung anabenbosa Arogon aser Yimten mensem mena tebilemtsü asadanga koba teloki kechi inyaksü nungdak agi mapalem shitak agia inyaksüji kanga tongtipang, ta jembitep. Temelenshi adoktsü nükla tulu nung lokti telen ajaki shilem agidang Tsüngremer tashi ajak nem agüja tasü itta tongbang takok agüjangma, ta ABAM sarasadem ayur.

ABAM ajanga Watiyim Baptist Arogon dang iba sentong acha-ayangba asoshi pelaba lemsateper, ta kasa sangdong nung shia lir.

Russia-Ukraine rara ya shin o ataloker asütsü: Greg Laurie

February 25, 2022: Pastor aser kaketzüür, Greg Laurie-i, tang Russia-i Ukraine amakba ya Laishiba nung tatemang anogo temaitsütem indang shia aliba ataloker asütsü akok, saka Khristantemi "Tsüngremi ajak aziöker" ta meteta melung süngzüksüla, ta ashi.

Laurie ya California nung aliba Harvest Christian Fellowship nung pastor inyaker.

Pai social media accounts ajanga, Ukraine nung tang tatalokba ya Laishiba nung shinzüka aliba den sendaktepa ali asü? ta nisung aikati kü dang asüngdang, ta ashi.

"Joko tatemang putu nung asenok alir ta ni bilemer. Khrista mashie mapang ka nung arutsü ta ni amanger. Laishiba nung tatemang anogo nung tataloktsütem indang asenok dang shia lir. Atangji Yisu-i tatemang anogo ya nosotsü atema tetsür ka kangshiba den medemdanga lir. Asenoki temaitsütem aika angur, tatalokbatem aika angur aser itemji ajanga asenok dang-Yisu Khrista tanaben arur, ta nenshia metetdaksür," ta pastor-i ashi.

Pastor Greg Laurie-i Mathi tapu 24 nung Yisu-i tatemang anogo nung temaitsü balala indang shia aliba lemsatep.

"Ukraine nung rara den külemi tang wara ya Yisu-i ashiba den puteper," ta pai ashi.

"Yisu-i kechi ashi? Tatemang anogo nung rara alitsü aser rara indang olulu angashitsü. Tang ama rara tulu

ya mapang talangka mataloki liasü. Tatemang anogo nung asenok matsüngdang wara alitsü indang shia lir. Coronavirus ya wara ka masü nungbo, ya kechiar ni memetet-iba ya alima tesem ajaklen prokshiba wara ka lir. Iba dak alia Laishiba nungsa alima nung lenir ka adoktsü aser pai alima amokbangba den nisungtem ashioktsüba indang shia lir, ajisüaka tatemang nungbo pa sentsü shidakba sayutsü. Aser pa dang Antichrist ajar," ta pai ashi.

Laurie-isa, Ezekiel tapu 38 nung shia aliba ya asütsü akok, ta ashi. Iba Lai tapu nung "Gog" aser "Magog" indang shia lir.

"Laishirtem aikati Ezekiel tapu 38 nung shia aliba amanger, kechiyong iba lai tapu nung Magog-i Israel amakba indang shia lir, aser iba ya (Magog) tanü lima nung Russia lir ta ni bilemer. Ni-a parnoki amangba nungji ai-aura akar," ta pai ashi.

"Ajisüaka Ezekiel kaket nung, Yihuda nung prokshitsü aser tanaben par lima (Israel) nung adenshitsu indang shia lir.

World War II mapang nung Holocaust (Yihuda nung jenti tepsetba) sülen alima tesem balala nungi Yihuda nung pei lima nung adenshitsu tenzuka liasü aser 1948 küm May 14 nü Israel ya official süa linük ka aküm. Anungji Laishiba nung shinzüka aliba iba shilemjibo atalokogo," ta pastor-i ashi.

"Ajisüaka Laishiba nung

yamai shia lir, Israel nungi north tsütsülen nungi Gog aser Magog la anema arutsü. Nai map repringdangra Russia kong aliar jangjatsü. Ukraine ya Russia yimli nung densema liasü saka 1991 küm pila. Parnok ano Russia shilem ka akümtsü asü? Akümtsü akok. Tang Russiamesüra Magog-i ambangyima inyakba ya repringdangra - asenoki Magog-i Israel amakba angutsü," ta pai ashi.

Ajisüaka Khristantemi Laishiba nung shinzüka alibatem nungi tesünep angutsüla, ta pai ashi.

"Asenok taküm aliba mapang nung Laishiba nung shinzüka alibatem ataloka arudar. Asenoki tatalokba aika ngua arudar. Laishiba nung shia aliba ama atalokba asenoki angur. Anungji asenoki kechi inyaksüla? Tsüngremi ajak aziöker ta asenoki metetsüla," ta pai ashi.

"Asenoki Laishiba nung tapak tatemangbuba züngogo-Jungkai Adok kaket tatemangbuba züngogo. Asenoki tatemang nungbo takok angutsü," ta pai shisem.

Paisa tamangertem dang Ukraine atema sarasademjang, ta ayongzük.

"Tang parnok kanga timtemdar. Parnok atema sarasademjang. Taruba anogo ishika tsüngda lenirtemi kanga tongtibang telemtetbatem agitsü, anungji Tsüngremi parnok nem shisatsü tajung agüjang ta asen lenirtem atema sarasademjang," ta pai mepishia metetdaksü.

ANOGO ABEN TSÜNGREM DEN

Tamang agi tenük lapok

"Aser kodang pa kidangi ait, nüpkokertemji pa dangi aru. Aser Yisui parnok dang ashi, "Ni ya inyaktetsü ta nenoki amanger asü?" parnoki pa dang ashi, "Hau Kibuba". Mat. 9:28

1998 ABAM sentong ka akaba mapang adianu Watiba ta sür nüpkoker ka arua lokti tekülem mapang nung pai ni iba lima nung tenük tapok taküm ka süaka Tsüngremi pa meshimetsür mekükdaktsü, pa nungdak ajak nung Tsüngremi teti yarir, anungji ni meshimetsür masü ta leplepa shir, pai ken ka "iba lima nung ni tenük tapok, alima tobur tajung menguaka saka nüpkokertemi khenü angutsü, kümtetba ajurur Yerusalem nungji lokti jakdang nokdaker adendang ajak tokolak anguma lur ola madoki nüktzü yima pai atenba ken angaba yimdangi arua bilemteter. Asen Kibuba Yisui alima nung taneptsüba jenti inyakba rongnung nüpkoker nisung jenti tenük lapokja aneptsüba osangtajung kaketter nung angur, aser item ajak nungji parnok pei tenük agi Yisui nuguaka par tamang agi Pa dak amanga ranglok nungji adangji parnok shih aser tanela anaprongla tenükji lapok. Adianutem, asen adianu Watiba daka iba kasa tamangji akaba asenoki pa taküm kuli ajanga angateter. Na ashiko shih tenük jagibo alima tobur tajungji nguya alitsü, saka kotak tobur ajungji mengutetsüsa nüpkok tia nung ali asü? Nai khen shisadandang.

SARASADEM

Kibuba Yisu Ne dak amangba nungi kü taküm nüpkok tia nungi nüchi taküm dangi anir ta ni metet. Iba tamang nung alitsü Nai ni yariangma ta sarasadem. Amen

Ukraine atema sarasademtsü ayongzük

Tir Yimyim azünger ajak dang Ukraine atema ajangajanga sarasademtsü ayongzük.

1. Eastern Europe aser Central Asia nung missionary timtiba yokbaji Ukraine lir. Iba mapa tajung raksatsütsü asoshi mojingi Russia Tir, Valdimir Putin molungjang ajungmesor Ukraine amakba ya anendakjang, ta sarasademdi.
2. Mr Putin ya alima nung masotsuba liasü. Kechiaser 1944 war mapang pa tetsü süogo ta ser ali nung rema yutsütsü lia Tsüngremi taküm meyiba agütsü aser pa 1952 küm aso. Iba taohiji pa molung nung bilemtetdakang aser paia Ukraine nung aliba nüburtem aochiang ta sarasademdi.
3. Russia nung sepaitemi International law anema Hospital aser civilian aliba tesem nung bomb yoka nisung tepsetba ya anendakjang, ta sarasademdi.
4. Ukraine nung aliba missionary tem aser tamangertem ajak tematiba Tsüngremi kümzüka yujang ta sarasademdi.
5. 1991 nung Russia nungi Ukraine Independent anguba tang Putin-bai tanaben rakzüksü merangba ya England-i India tanaben agitsü merangba den saku. Iba tamachi shisatsu ya melenshidakjang ta sarasademdi.
6. Ukraine ya takar lima, 600 000 square kilometer aser nütsüng yongsük million 44. GDP 155 billion US dollar aser 3700 USD per capita income. Ali temo aliba lima ya Russia-i azü-abonga terepringdaksü ta sarasademdi.
7. Iba yimmakba yagi 3rd World War kuma maotsü atema sarasademdi aser iba yagi Yisu tanaben arutsü anasaba akümer, ta amangbapur ajak saksalema lidi ta ayongzük.

- Dr Toshimanen Ozukum
drtoshimanen2020@gmail.com

OLONG PAITEP # 6097

| | | | | | | | | | | |
|----|----|--|----|----|---|---|----|---|----|---|
| | 1 | | 2 | | | 3 | | 4 | | 5 |
| | | | | | | | | | | |
| 6 | | | | | | | | 7 | | |
| | | | | | | | | | | |
| | | | | | 8 | | 9 | | | |
| | | | 10 | | | | | | | |
| 11 | | | | | | | | | | |
| | | | | 12 | | | | | | |
| 13 | 14 | | 15 | | | | | | 16 | |
| | | | | | | | | | | |
| 17 | | | | | | | 18 | | | |

- | | | | |
|------------------------------|-------|------------------------------|-------|
| TIPILEN | | LANGTSÜNGLEN | |
| 1. Inyaker ajangtetba | - (3) | 1. Meshidak | - (3) |
| 3. Bangsemo adokdak | - (5) | 2. Tanaben soshir | - (7) |
| 6. Shitak mesüi inyak | - (7) | 3. Iba anogo | - (4) |
| 7. Ya mimong nung angur | - (3) | 4. Meshi | - (3) |
| 9. Reprangzük | - (4) | 5. Yagi mi tsükloker | - (9) |
| 10. Tasola | - (5) | 6. Shi tapu ka | - (9) |
| 11. S _ _ _ _ | - (4) | 8. Yagi ayimer saka ozü masü | - (3) |
| 13. Yagi ajak ashiochtsür | - (3) | 9. Ajokba shiruru ka | - (7) |
| 15. Ki aokba oset | - (7) | 12. Inyaktet | - (4) |
| 17. Ak shi nung inokba tasen | - (5) | 14. _ _ _ hi | - (3) |
| 18. Ishika | - (3) | 16. Akümüli nungi pilar | - (3) |

OLONG PAITEP # 6096 TELANGZÜBA

- | | |
|---------------------------------------|--------------------------------------|
| TIPILEN : | LANGTSÜNGLEN : |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen, | 5. Lenti, 7. Tajangzük, 11. teronem, |
| 14. Ola, 16. Talak, 17. Mazük. | 12. Sempa, 13. Jahaz. |



2022 FEBRUARY ITA LILI RESULT !

February ita nung Lili tajungtiba (First) shimteta tanü yangi lepshia agütsür. Lili zülur-i March 10, 2022 tashi nung Tir Yimyim Office nungi senpet agizüchtsü mepishia metetdachtsür.

ALOKBA DOCTOR DEN :

- Alokba** : Sir, Ozü tantsü ya kecha mangashi kümoko, koma süla na?
- Doctor** : Nai la anir marujito, mapa ka inyakang- na kidangi or nü tantsü sulenji feet 15 shi pilar "Tantsü na kechi inyaker" ta shili, kecha melangzura ano tera tanabai or asungdangli ta inyakdangji feet kwi nungi angashir aji note sür arung no?
- Alokba** : Haini sir.
(Ki atongdang tantsüji sorochiokya ngur oji nungi)
- Alokba** : Tantsü kechi aon asor? (Anasabai anaben tashi asungdang telangzuba maliji jidaka or asungdang)
- Tantsü** : Asemben tashi ni nashishi asora ta shiokoto, narongjaker ati.

Lilir : WhatsApp

TANÜBO NAI LANGZÜANG

Q. 'Dharma Guardian' Exercise ya India aser ___ tsungda küm shia agiba Military Exercise ka lir.
[A] Sri Lanka [B] Japan [C] Australia [D] UAE
_____ (Taruba adok nung onoki langzüksü)
YASHI ADOK TELANGZÜBA : World Economic Forum

AO OSHI ANGAZÜKDAK:
TANÜ ANGAZÜKTSÜBA OJANG

Merep
(v) tebanglen nungi tango agi asüketa tzü ajemba (suck)
* Mizo nungertemi chiyongdang aontsü **merepa** chiyonger.

Merep
(v) shiruru techanu bendaktsüba (impregnate)
* Ozü ak teyinla tanep techanu **merepdaktsü**.

NAI-A YA METETTER MA

- MARCH 2022' ITA TONGTIBANG ANOGO KAR:**
- 1 March Zero Discrimination Day, World Civil Defence Day, Self Injury Awareness Day
 - 3 March World Wildlife Day, World Hearing Day
 - 4 March National Safety Day, Employee Appreciation Day, Ramakrishna Jayanti
 - 8 March International Women's Day
 - 9 March No Smoking Day (Second Wednesday of March)
 - 10 March CISF Raising Day
 - 12 March Mauritius Day
 - 14 March Pi Day
 - 14 March International Day of Action for Rivers
 - 15 March World Consumer Rights Day
 - 16 March National Vaccination Day
 - 18 March Ordnance Factories Day (India)
 - 20 March International Day of Happiness, World Sparrow Day
 - 21 March World Forestry Day, World Down Syndrome Day, World Poetry Day
 - 22 March World Water Day
 - 23 March World Meteorological Day
 - 24 March World Tuberculosis (TB) Day
 - 25 March International Day of the Unborn Child
 - 26 March Purple Day of Epilepsy
 - 27 March World Theatre Day

SUDOKU # 6136 TELANGZÜBA # 6135

| | | | | | | | | | | | | | | | | | | |
|---|---|---|---|---|---|---|---|---|---|---|---|---|---|---|---|---|---|---|
| | 5 | | 9 | | 2 | | 8 | 3 | 9 | 7 | 4 | 1 | 2 | 5 | 6 | | | |
| | | 1 | | | 2 | 4 | | | | 7 | 4 | 6 | 9 | 2 | 5 | 3 | 1 | 8 |
| 4 | | | 6 | | 7 | 5 | 8 | | | 2 | 5 | 1 | 8 | 3 | 6 | 7 | 9 | 4 |
| 7 | 1 | | 8 | | | 6 | 4 | | | 1 | 7 | 5 | 4 | 6 | 8 | 9 | 3 | 2 |
| | | | | | | | | 5 | | 4 | 9 | 2 | 5 | 1 | 3 | 6 | 8 | 7 |
| | 4 | | | | | 2 | 3 | 1 | | 3 | 6 | 8 | 2 | 7 | 9 | 1 | 4 | 5 |
| 8 | | | 2 | | | 9 | 6 | 4 | | 9 | 2 | 3 | 6 | 5 | 4 | 8 | 7 | 1 |
| | | 4 | | 8 | | | 5 | 2 | | 5 | 1 | 7 | 3 | 8 | 2 | 4 | 6 | 9 |
| | | 2 | | 5 | | 7 | | | | 6 | 8 | 4 | 1 | 9 | 7 | 5 | 2 | 3 |

OJANG LUTEP # 5682

- KTLOI :
- GNUN :
- KIBOARSA :
- GABENDAN :
- ÜTSAGÜR :
- AKINY :
- NGNNUANG :
- AREMAPN :
- ÜMEDESÜSMA :
- KEINYAR :

OJANG LUTEP TELANGZÜBA # 5681

**KANGA DANG RAJEMA JEMBR SAKA
MAPA AGI SAYUTSÜ ATSÜAYONGA ALIR**

TAN HOPTA ATEMA - KOMA SÜLA ?

Q. Kohima aser Dimapur nung alir Aotsür Aor vote ajak Mokokchung district kübok pei pei yimtsüngi belena bener ao nunga koma süla ?



New Delhi, February 28, 2022: Russia-i Ukraine amakba anema Hombarnü Jantar Mantar, New Delhi nung International Action Council for Democratic World Government nungi züngsemtemi longkak aitba den külemi yimjung atema candle march agiba noksa nung angur.

General Assembly atema vote agütsütepba nung India maden

United Nations, Tsüklai/February 28 (Agencies):

Russia-i Ukraine amakba anema UN General Assembly nung rongdak senden ka ayongzüksü atema UN Security Council nung vote agütsütepba nung India maden. UNSC nung vote agütsütepba nung General Assembly ayongzüksü atema vote 11 agütsüba ajanga General Assembly ayongzüksü bangzüng renem. India, China aser UAE linüktemi vote magütsü aser Russia-i iba bangzüng anema vote agütsü.

1950 küm nungi tenziika tang tashi nung General Assembly rongdak senden 10 ben dang mena lir aser tang 11 benbuba

amentsü.

Linük 15 densema aliba UN Security Council senden Amongnü nikonngang mena Russia-i Ukraine amakba anema rongdak senden ka ayongzüksü atema vote agütsütepba liasü.

UNGA senden ya procedural lir, anungji Security Council nung permanent züngsem pongu- China, France, Russia, UK aser US linüktemia vote agütsütepba liasü.

Amongnü India-i vote magütsüba dak sendakba nung India Permanent Representative to the UN Ambassador, T S Tirumurti-i, "Iba onük nung Council-i tesisabuba senden ayongzüksü

sülen Ukraine nung ano tensa tamajungba akümba atema sasar," ta metetdaksü.

Paisa, "Tanga lenmang mali saka ken o jembiba ajanga dang iba tensa bentettsüla. Belarus arrtsülen telok anapronglai (Russia aser Ukraine) senden amentsü atema tanü sangdong agütsütepba onoki (India) pelaa agizüker," ta metetdaksü.

India ketdangser Tirumurti-isa, India-i Ukraine nungi maruteti aliba sensotem, talisa kaketshirtem atema tebilemtsü akar, ta metetdaksü.

Ukraine-Belarus arrtsü nung Ukraine aser Russia na tsüingda senden mendar. Ukraine nung tang tashi nung tanur 14 densema civilian 352 tashi süogo.

PM Modi leniba nung Ukraine tensa atema senden amen

New Delhi, Tsüklai/February 28 (Agencies):

Tang Ukraine tensa atema Hombarnü Ato kilonser, Narendra Modi leniba nung senden ka amendang Ukraine nungi India nung anir aruba maparen nung yariteptsü atema Union Minister pezü Ukraine kidanger linüktem dangi yoktsü atema telemtetba agiogo, ta ketdangsertemi metetdaksü.

Kaketshirtem densema India nung anir aruba maparen nung yariteptsü atema Union minister pezü-Hardeep Puri, Jyotiraditya Scindia, Kiren Rijiju aser V K

Singh nung yoktsü.

Scindia-i Romania aser Moldova na nungi India nung anir aruba maparen nung yariteptsü aser Rijiju-i Slovakia nungi India nung anir aruba maparen nung yariteptsü.

Hardeep Puri Hungary linüki yoktsü aser VK Singh Poland-i yoktsü aser tenatia India nung anir aruba maparen nung yariteptsü.

Amongnü Ato kilonser, Modi-i India nung kaketshirtem ajak kümzüka linüki anir arutsü mapaji sorkar atema tongtibangtiba, ta metetdakja liasü.

Modi leniba nung amenba senden nungji External Affairs Minister, S Jaishankar, Commerce Minister Piyush Goyal, National Security Adviser Ajit Doval aser Foreign Secretary, Harsh Vardhan Shringla nung densema tongti ketdangsertem aika aden.

Amongnüa Modi leniba nung Ukraine tensa atema senden amen. Ukraine anasa aliba linüktem nungi India nung kaketshirtem tekaraba nung anir arutsü atema item linüktem den amalitepa inyaksü asoshi lemteta liasü.

Foreign Secretary Shringla-i Ukraine tensa indang metetdaksü

New Delhi, Tsüklai/February 28 (Agencies):

Hombarnü Foreign Secretary, Harsh Vardhan Shringla-i parliamentary committee ka nem Ukraine tensa, talisa India nung anir aruba osang metetdaksü.

Shringla-i Parliamentary Standing Committee on External Affairs dang, India nung anir arutsü atema Ukraine den kidanger linük pongu nung aliba arrtsü check post aser Indian Embassies dangi Russia oshi jembir ketdangsertem yokogo, ta metetdaksü.

Ukraine den kidanger linük ponguji Hungary, Poland, Romania, Slovakia aser Moldova linüktem lir.

Hombarnü BJP lenir, P P Chaudhary mendenbuba ser Parliamentary Standing Committee on External Affairs senden mena financial year 2022-23 atema ministry nem lemzüksüba budget atema o lemtepa liasü.

Parliamentary Committee nung züngsemtemi mepishiba nung ajemdaker Shringla-i Ukraine tensa, talisa India nung anir aruba osang metetdaksü.

Paisa India sorkari tayimtsü ajanga sensotem Ukraine nungi anir arutsü atema Operation Ganga tenzüksü osang metetdaksü.

Ukraine den kidanger linük pongu- Hungary, Poland, Romania, Slovakia aser Moldova indang check post tem ajanga India nung anir aruba osang pai metetdaksü.

Shringla-i, tang tashi nung India nung kaketshir 1,200 shi tayimtsü pongu ajanga anir aruogo, iba dak alia Ukraine arrtsü adena oor alir meyrjang aika anir arutsü atema inyakdar, ta ashi.

Ukraine nung India nung kümzüksü atema India sorkari International Committee of the Red Cross den inyakba osanga pai metetdaksü.



Delhi sorkar 'New Liquor Policy' anema February 28, 2022 nü New Delhi nung Delhi BJP Tir, Adesh Gupta den BJP Lok Sabha MP ana- Hans Raj Hans aser Parvesh Sahib Singh Verma nungeri osangbenertem den jembiba noksa nung angur.

India nung ano nisung 8,103 dak Covid putet aser 119 asü

New Delhi, Tsüklai/February 28 (Agencies):

India nung ano nisung 8,103 dak coronavirus putet aser tesüiba ghonda 24 tsüingda iba tashidak agi shiranger 119 asüba densemabo linük nung tang tashi nung iba tashidak agi shiranger ajak senteper 5,13,843 süogo, ta Hombarnü Union Health Ministry-i metetdaksü.

Tang India nung coronavirus agi teshirangdakpur lakh 1.02 dang lir aser ibaji coronavirus caseload nungi shilem 0.24 dang lir. Tesüiba ghonda 24 tsüingda iba tashidak agi shiranger 16,765 anepogo, aser tang tashi nung iba tashidak agi shiranger shilem 98.56 anepogo.

Tang India nung anogo shia

coronavirus positive putetba shilem 1.11 dang kümogo aser hopta shia positive putetba shilem-a 1.17 dang kümogo.

Tang tashi nung India nung samples crore 76.74 dak tema tendangogo aser Covid vaccine dose ajak senteper crore 177.50 dak tema agütsüogo.

2020 küm August 7 nü India nung coronavirus case lakh 20 ajung, September 16, 2020 nü case lakh 50 ajung aser December 19, 2020 nü crore 1 ajung.

Yaküm May 4 nü India nung coronavirus case crore 2 ajungba sülen anogo 50 kija nung crore 3 ajung aser taküm January 26 nü covid case crore 4 ajung.

Mamata-i PM Modi dang party ajak senden ayongtsü mepishi

Kolkata, February 28 (Agencies):

Trinamool Congress tongti lenir aser West Bengal Chief Minister, Mamata Banerjee-i shidi ka ajanga Ato kilonser, Narendra Modi dang Russia-Ukraine onük nung lai sorkar nungita yaritsü, ta metetdaksüba den külemi Ukraine tensa dak sendakba nung party ajak senden ka ayongzüksü mepishi.

"Tang alima tensa dak

sendakba nung ni na nungita yaritsü, iba denji külemi iba onük bentettsü atema linüki telemtetba agitsü asoshi nai party ajak senden ka ayongzüksü bilemdar asü," ta lai shidi ka ajanga Ato kilonser dang mepishi.

"Iba lima nung democracy tulutiba linük ka ama alima nung yimjung alitsü atema India-i anir kecha marendaki inyaksüla," ta laisa ashi.



February 28, 2022 nü New Delhi nung National Science Week tembangba sentong nung Minister of State for Science and Technology and Earth Sciences (I/C), Prime Minister's Office, Personnel, Public Grievances and Pensions, Atomic Energy & Space, Jitendra Singh-i Science Communication Awards agütsüba noksa nung angur.

Russia aser Ukraine ketdangsürtem jembishinü tenzükogo



Gomel, Feb 28 : Belarus arütsü nung aliba Gomel yimti nung Russia aser Ukraine ketdangsürtem Hombarnü ajurutepa linük ana tsüngta rara adoka aliba indang jembishinüba mapang tangokba noksa ka yangi angur.

Kyiv, Tsüklai/Feb. 28 (Agencies): Ukraine-Belarus arütsü nung Russia aser Ukraine ketdangsürtem ajurutepa Russia-i Ukraine amakba indang jembishinü tenzükba noksa temai adok tenzükogo.

Iba senden amentsü lia Ukraine Tir Volodymyr Zelenskyy-i par linük nung tekeratiba nung ceasefire aginer, ta shia liasü. Kasa mapang Russia-i anatsü ajangzüksüsa tezüngzüktep ka aginer, ta ashi.

Ajisiüka Ukraine anüdoklen Kharkiv yimti nung Russia nunger temi injang-bomb tesashi khalokja nisung aika asü aser noklang junga yiru, ta Ukraine ketdangsürtemi ashi.

Moscow sepaitemi nisung alidak Grad missiles amshia

amak, ta Kyiv interior minister indang adviser Anton Herashchenko-i Facebook nung ashi.

"Nisung ter dak tema tepsetogo aser noklang junga yiruogo! Alima ajungai iba azüdokshi ya angutsüla! Tashiyim amshia amaker asoshi tasüba!" ta zülua liasü.

Russia-i Ukraine amakba mapang tang tashinung civilian tem asüba tejangja ashitsü makoker. UN Human Rights chief Michelle Bachelet-ibo civilian tajemba agi 102 tepsetogo aser ano 304 yirua lir, ta Hombarnep shia liasü.

"Civilian tem ya timba tesem tulu nung kongshia apokba mapang asüba lir, aser itemji injang-bomb tulu, multi-launch rocket system aser tayimtsü

amshia amakba dena lir. Asangsang nung asür ya kanga agi timba alitsü ama tsübuva bilemer," ta Bachlet-i ashi.

Ukraine nung COVID-19 aser danga tashidak agi shirangertem aser rara nung yirur aliba yariba nung amshiba oxygen kanga ajema kumogo, ta World Health Organization (WHO) ajanga ashi.

Linük yimtiba, Kyiv nung densema linük telungzük nung oxygen yangludak nungi bener moteter, anungji rizünga yua aliba ghonda 24 tsüngta agimatsü.

Poland ajanga oxygen abentsü atema jembitepba mapang lir, ta WHO ajanga ashi.

Hospital tem nung electricity aser power meperi akumba osangtema lir.

Russia nung rara anema longkak aiter 2,000 dak tema puogo

Moscow, Tsüklai/Feb. 28 (Agencies): Tir Vladimir Putin-i Ukraine amak tenzükker anogo pezübuba nung Russia nung aliba police temi linük tesem balala nung rara anema longkak aiter nisung 2,000 dak tema puogo.

Küm aika Russia nung nüburttem longkak aiter pua merenshiba osang bendenba tentet, OVD-Info ajanga ashiba agi Deobarnü nisung 2,114 apu.

Ibaji ajanga Putin-i Brehostibarnep nungi Ukraine amak tenzükker longkak aiter apuba 5,250 jungogo, ta ashi.

Moscow nung aiben longkak aiter dang riot police timba liasü, kong kari yimjung temaitsü aser rara anema yimyim Russia aser Ukraine oshi nung zülua amer liasü. Kari mask nung "Ojang süang" ta zülur inoka liasü.

Shinga dena sendaktepa maliba television channel, Dozhd indang osangbener kati police dang pa indang accreditation sayuaka aser 'press vest' sema liaka apu.

Saint Petersburg jila nung Gostiny Dvor department store kimalen rara anema longkak aiter noklang aika adenshia teka amteper yimyim ayima liasü.

Aikati poster nung "Rara magizükker," "Russia nungertem kidangi oang" aser "Ukraine asoshi Yimjung" ta zülua amer liasü.

"Yangji nisung million aika masü noklang aser meyerijang adenshiba ya maksü lir," ta iba longkak aiter nung shilem agir arishi küm 35 tain engineer Vladimir Vilokhonov-i ashi.

Ano longkak aiter arishi küm 25 tain Alyona Stepanovai, "Yagi arutsü ya asen mapa aser teinyaktsü lir," ta ashi.

Riot police temi rara anema yimyim ayimba mangashidaktsütsü meranga linük meimba ken temlokja liasü.

"Ni rara anema nokdaker. Ni 1941 küm aso, anungji ni meteta lir," ta Valeria Andreyeva-i ashi, shiba Nazi Germany-i Soviet Union amakba küm soa liasü.

Deobarnü longkak aiter ya opposition politician Boris Nemtsov tepseter küm tenet ajungba anogomung liasü.

Moscow nung nisung kar Kremlin kima Nemtsov khasetba tesem anasa apu, ta osangbener temi ashi. Police temi longkak aiter ka atsür aoba mapang "Rara magizükker!" ta ayimtena liasü.

Russia-i 2014 küm Crimea amokbangba mapang Nemtsov ya Putin anemer tejangja nübu ka liasü aser Ukraine nung Russia busemba separatist tem Moscow-i yariba anema nokdak. Aser Ukraine nung tang rara ya separatist region ana kumzükka ayutsü atema 'special operation' ka agir ta Putin-i ashi, saka par sepaitem Ukraine tesem ajungalen amai rarar.

Russia-i ali, tzüym aser anünglen nungi amakba asoshi telangzüba agüja Ukraine indang anüolen tembar linüktemi tenokdangba jenti agütsüogo.

Ukraine sepaitemi Kharkiv yimti nung Russian sepaitem den kanga sashia raraba mapang Putin-i Deobarnü pa indang mitkar tanishirtem dang nuclear-armed forces tem saksalema alitsü totuyuba agütsü.

Europe kübok linük ajungalen nisung meyerijang aika Russia anema Deobarnü longkak aita liasü aser Berlin nunga Ukraine busema nisung 100,000 shi longkak aita liasü.

Ukraine nem sen million euro 500 (\$560 million) jenjang nok-o-nü agütsüba nung yariteptsü atema European Union defence minister tem senden ka amentsü lir.

Kyiv-i Russian sepaitem aridoktsü merangba nung yaritsü atema linük balalai Ukraine nem nok-o-nü agütsü tenzükogo.

South Korea & Singapore nati Russia nem tenokdangba agütsü

Seoul, Tsüklai/February 28 (Agencies): Ukraine amakba atema Russia merenshitsü asoshi South Korea aser Singapore nati tenokdangba agütsüba sangdongogo. Iba mangatetep nung kanga yakbangsüa shilem magiba tesem ka nungi dena tenokdangba agütsüba ajanga Moscow akoksatsü.

Seoul-i oset kar nung tenokdangba agütsütsü aser tanga linüktem den jangyu medema SWIFT international payments system nung Russia indang bank tem nem tenokdangba agütsütsü aser Ukraine nem teyari timba agütsütsü, ta linük foreign ministry-i Hombarnü sangdong ka ajanga metetdaksü.

Tenokdangba agütsüba osettem rongnung electronics, semiconductors, computers, information and communications, sensors & lasers, navigation & avionics, aser marine & aerospace equipment tem densema lir.

South Korea-isa, global energy market süngjema kümdaktsütsü atema oil reserves tali salatsüba

ajungkettsü aser Europe dang LNG ayokba densema tanga jenjangtem agütsü, ta ministry-isa ashi.

"Russia-i Ukraine amakba Korea sorkari aitsür aser international lokti nung khuret angatetba züngsem ka ama iba tensa yimjung nung bentettsü atema international lokti inyakyim nung shilem agütsü telemtetba agiogo, kong rongsenketzüng nung tenokdangba agütsüba densema lir," ta kasa sangdong ajanga metetdaksü.

Seoul ya US den kanga junga sendaktepa lir aser parnoki taoba mapang Moscow nem tenokdangba balala agütsütsü atema anüolen aliba linüktem nem teyari agütsütsü sangdongogo.

Kasa mapang nung Singapore-ia, Russia nem sanction aser tenokdangba tapet agütsütsü ta shiogo, kong rongsenketzüng aser Ukraine nunger anema hadir ama amshitettsü aliba osettem belenba azüoktsü densema lir.

Singapore-i UN Security Council resolutions sülen anidaker ajisiüka linüktem nem

tenokdangba agütsübabo aiben majangshi aruogo. Southeast Asia linüktem rongnung Singapore aser Indonesia nati dang taoba hopta Russia tir Vladimir Putin-i Ukraine amakba aitsüogo.

"Mulung ajemba linüktem den jangyu medema Singapore-ia Russia anema sanction aser tenokdangba tapet agütsütsü asoshi inyaksangshitsü sentong lir," ta Minister Vivian Balakrishnan parliament nung ashi.

Balakrishnan-isa ashiba agi, tensa kanga mejungi akümba aser taoba hopta Russia-i draft Security Council resolution ka magizükba atema tenokdangba agütsütsüsa aküm. Security Council resolution ya Singapore-ia co-sponsor süa liasü.

"Onoki Ukraine nung indang indanga amshiteta Ukraine nunger nem timtem agütsütsü aliba osettem belener aoba azüoktsü," ta pai ashi.

"Onokisa Russia den sendaka aliba Russian bank kar aser senotsü tsütatepba nung tenokdangba agütsütsü," ta pai shisem.

Maneni Japan-ia Hombarnü ashiba agi, Russia nem takok tashi timtem agütsütsü atema parnoki international lokti den longjemer inyakdar. Tokyo-i taoba hopta Putin aser tongtimbang sorkar ketdangsürtem indang rongsen freeze sütsüba densema tenokdangba agütsüba aika sangdongogo.

Russia-i Kidanger linük amakba atema Asia nungi taitüsü aikabo madok, kong linük aika indang foreign policy nung tashitait linüktem den tensendaktep liromedemtsü densema lir.

Russia den sendaktepa aliba linük China-i, Putin inyakyim ya "invasion" ka ta ajatsü memulungi liasü aser tenokdangba balala agütsüba aitsüogo. Kasa mapang nung military-i yimsü asüba linük Myanmar-i Moscow pusemba sangdongogo.

Cambodia, India, Malaysia, Philippines, Thailand aser Vietnam amala linüktemi tensa süoki ia agiba lemsatepogo aser Moscow maitüsü mangatetep aliba sensaksem ajanga bentettsü ayongzükogo.

Mulungnen O



ASO :
03/8/1950

ASÜ :
21/2/2022

Onoki teti meima aliba ojala Lt. Alikala (Longsa), shirangba anogo nungi tenzükera la iba akümüli lenmang tembanga onok mangyim jashi tia nung alidang adianutem kija kibong, kiyonger, medemertem, yimti nūburtem, lokti, arogo aser office balala shirnokisa onok mulung sunepstüogo, nenok ajak dang iba osang kaket ajanga pelaba lemsateper.

Ajak moatsüsang Tsüngremi nenok ajak moajangma ta onok sarasadem.

Chirnurtem, Kinunger, Anükapang & Adianutem.

**Office of the
Akhoya Students Union
Pelaba Sangdonger**

R.C.Chiden Jamir Memorial Gov't high School Changtongya nung HSLC Exam center sūtettsüsa maparen nūburi aginūba ama asangsang nung ataloktsüba asoshi asen lenir Wb. IMNATIBA Hon'ble Advisor Industries and Commerce NIDC; Skill Development and Entrepreneurship G.O.N . dang pelaba lemsateper.

Iba maparen dak sendakba nung shirnokisa rongsen, nūbu & shisatsü agi yariogo, nenok ajak dang Akhoya students union-i pelaba lemsateper.

Sd/-
**Satemmongba
President**

Sd/-
**Chubakokla Lkr
General Secretary**

SAMABA METETDAKTSÜR

Ni, **Wt. Limatula**, W/o. Wb. Lanutemsu Yaden (Merangkong Village), Aoyimkum Village Council ajanga 22.03.2014 anogo Patta No. 948 keter agütsüba Provisional land patta ya January 20, 2022 nū Xerox copy yanglutsü atema bener aodang Circular Road nung sama. Kari dang iba patta ngura imlibilema kibur nem meyipjangma.

**Wt. Limatula Yaden - W/o Lanutemsu Yaden
Aoyimkum Village # 9436005112 # 9810999511**

ALI AYOKER

Land for sale at **Indisen Village**, Dimapur total land size 60 by 90 Sq.ft. and land value Rs. 16,50,000/- (price negotiable)
Contact : 9862713420

Mokokchung nung IPPI drive agiogo



Mokokchung, Tsüklai/February 28, 2022: Mokokchung nung Intensive Pulse Polio Immunization (IPPI) drive agiba mapang, Imlong Place, Mokokchung nung ADC Mokokchung, Shashank Pratap Singh-i tetsür tanur ka nem mezüing Polio Drop jemdaktsüba noksa nung angur.

Mokokchung, Tsüklai/February 28, 2022 (TYO): District nung Intensive Pulse Department of Health and Family Welfare, Mokokchung ajanga Deobarnü District kübok tesem ajunga nung arishi küm 0 nungi 5 tanurtem atema Intensive Pulse Polio Immunization (IPPI) drive takok ngua agiogo, ta sangdong ka ajanga metetdaksü.

District nung Intensive Pulse Polio Immunization (IPPI) drive atema IPPI Booth 224 shi amenoka liasü. DPO RCH & UIP, Dr. Ayangla Saku-i ashiba agi, District nung arishi küm 0 nungi 5 tanur 6343 nem Polio Drops agütsüogo.

Longleng nung National Science Day mungogo

Longleng, Tsüklai/February 28, 2022 (TYO): India nunger physicist CV Raman-i 'light scattering' wadang nung maparen tulu inyakba bilemtetta, Hombarnü VDB Hall Longleng nung "Integrated approach in science and technology for sustainable future" omen nung ajemdaker 'NATIONAL SCIENCE DAY' anogomung dak sendakba nung Inter-School Science Exhibition Competition ayongzük, ta sangdong ka ajanga metetdaksü.

Iba Inter-School Science Exhibition Competition ya District Administration aser Mahila Shakti Kendra Longleng longjemer ayongzüka liasü.

Iba sentong nung Phungla Phom, WWO MSK-i telok pela agizük aser National Science Day amungba indang lai tongmelang agi metetdaksü.

Iba competition atema tetendanger temji Dr. Lima Phom, Chief Functionary Yingle Mission Society, R. Radhakrishnan Graduate teacher, GHSS LLG aser Dr. Manan Phom MO, PHC Yongnyah liasü. Iba tetoktepba nung kaketshir temi sayuba



Longleng, Tsüklai/February 28, 2022: National Science Day anogomung dak sendakba nung VDB Hall Longleng kübok Inter-School Science Exhibition Competition ayonga agiba mapang kaketshirtemi shilem agiba noksa nung angur.

model/lempatepba onük rongnung "Sewage Treatment Plant, Soil Erosion, Assembling and working of Robotic, Wind Turbine, Kaleidoscope, etc" tem liasü.

Iba 'Inter-School Science Exhibition Competition' nung Christian High School-i mezüingbuba jenjang nung takok angu. Kasa tetoktepba nung Phom Lempong School aser

Shamakok Mission School nati tanabuba aser tasembuba jenjang ajangzükter.

Takok angur nem certificate aser senpet agüja liasü. Iba tetoktepba nung tetsür kaketshir 25 agi shilem agiogo. Iba sentong nung Block ajak nungi Phom Students Conference executive, tesayur aser kaketshir tem denogo, ta kasa sangdong ajanga ashi.

Advisor Sukhalu-i Ahthibung nung GHSS semzüktsü

Peren, Tsüklai/February 28, 2022 (TYO): Honibarnü (27.02.2022) Ahthibung, Peren nung Advisor School Education, K.T. Sukhalu-i Government Higher Secondary School tasen semzükja liasü, ta sangdong ka ajanga metetdaksü.

Advisor, K.T. Sukhalu-i ashiba agi, Hindi tesayur 2,140 (CSS kübok tesayur 1,308 aser State programme kübok tesayur 832) aser training magii alir tesayur 830 (State 223 aser CSS 607) shi lir aser inyakyim nung renema aliba ama Training agütsü asoshi training magii alir tesayurtem dang tuyuogo.

NCTE temzüing kübok tesayur inyaksü atema tesayur ajak qualification tejangja alitsü shia lir. Ajsüaaka, sorkari mapang agütsü yongjia tesayur aika ket nung B. Ed & DLED qualification mali. Ibayongji, training magii alir tesayurtem atema VRS nung Department-i inyakdar, ta pai metetdaksü.

Sukhalu-i, COVID-19 ajanga appointment nung tenokdangba adoka aser tesüiba küm ana nungi recruitment inyakyim nung timtem adoktsüba asadanga, sorkar mapa nung ajemoktsü/inyaksü atema April 22, 2021 nungi tenzükä küm ana atema

'one-time relaxation' agütsütsü Sorkari lemtet, ta ashi.

Department-isa science, math aser hindi nung graduate tesayurtem recruitment agütsü atema yakta advertisement agütsütsü, ta pai shisem.

Education system nung temelenshi adokdaksütsü akok. Tanur ka shisaliok reju nung züingdakja aser parnok angazükdaksütsü ya Department aser lokti khuret lir aser Sorkari akok tashi facility shitak agütsü asoshi inyaker, ta pai ashi.

Sukhalu-isa, School nung tesayurtem attendance reprangshimtsü aser parnok maparen asadangtsü asoshi yimtsüing nung tekolakpur, GBs, Council Members, SMC aser VEC dang mepishiogo.

Sorkar school tem nung kaketshir ajema akümba ya tebilemtü tulu lir, koba yimtsüing nung tekolakpur temi ola adoktsü/ashitsü nüngdaker aser kaketshir peria maliba/ajema akümba ajanga sorkari School tem GHS nungi GMS aser GPS tashi ajemdaksütsüsa akümer, ta K.T Sukhalu-i ashi.

Tarutsü tajungba asoshi pei chirnurtem education nung temulung agüja yaritsü asoshi pai tsüraburtem ajungshia liasü.

Kasa sentong nung tongti tesemdanger, Advisor, Namri Nchang-i ashiba agi, Peren District nung alir talisa Ahthibung Sub-division nung sensopur tem atema iba anogo ya otsütsü asütsü.

Ahthibung sub-division nung alirtem mangdang asangsang nung ataloktsüba atema, Namri Nchang-i Chief Minister, Advisor School Education aser Principal Director, Directorate of School Education dang alakteta pelaba metetdaksü.

Maneni, iba sentong nung Advisor, Prisons, Printing & Stationery, H. Haiying; Advisor, Treasuries & Accounts & National Highway, Longrineken aser Principal Director, Directorate of School Education, Shanavas C, IAS nungeri jembiogo.

Iba sentong nung SDO (C) Ahthibung, Vekusheyi Rhakho, NCS menden liasü aser KIN President, L. Singisit IPS (Retd.)-i tepela o jembi. GHSS Ahthibung maparen indang KSON President, Thangjamang. Sr. SDEO-i metetdaksü aser DEO Peren, Repainla Jamir-i tepela anküp o jembi. GHSS Ahthibung tasen meshitetta ES KCCNS, Rev. Chungpao Khongsai-i sarasademtsü, ta kasa sangdong ajanga ashi.



Dimapur, Tsüklai/February 28, 2022: Hombarnü, Managing Director NHHDC Ltd. Zakabo V Rotokha aser tanga ketdangsur matsüingdang Chairman NHHDC Ltd. Miathou Krose-i 'Ghandhi Shilp Bazar' sentong lapoktsüba mapang tangokba noksa nung angur. Iba Bazar ya anogo 10 (28.02.2022 nungi 09.03.2022) atema lapoktsü. Ghandhi Shilp Bazar nung stall 100 dak tema lapoka lir aser North-Eastern Region state balala nungi iba Bazar nung shilem agidar. Northeast tesem nung teka mapa inyaker (artisans) nem shishilembatsü sabang agüja aser tanga technical teyari agütsütsü nükjidong nung iba Bazar ayongzük. Iba Bazar sentong atema Development Commissioner (Handicrafts), Ministry of Textiles, Govt. of India, New Delhi indang Office ajanga senotsü teyari agütsüogo.

ATP Rankings: Daniil Medvedev number one asayar kümogo



Paris, Tsüklai/February 28

(Agencies): Hombarnü sayaba ATP rankings nung Daniil Medvedev-i Novak Djokovic ajateta world number one asayar kümogo. 2004 küm nungi tang tashi nung Djokovic, Rafael Nadal, Roger Federer aser Andy Murray nungeri dang number one jenjang melentepa bena aliba tang pai ajatetogo.

US Open champion Medvedev ya Yevgeny Kafelnikov aser Marat Safin na sülen Russia nung teburtem rongnungi world No. 1 jenjang ajangzüktetba asayar tasembuba lir. Tang tashi nung teburtem ajak senteper asayar 27-i temaba jenjang tongteta lir.

Arishi küm 26 tain asayar shiba taoba hopta Nadal-i Acapulco semi-finals nung tsükdakja liasü, pa Djokovic

Dubai nung quarter-final nung tsükba sülen temaba jenjangi atutsü jangjar liasü.

Djokovic-i otsü tasen ka yanglua world No.1 jenjang hopta 361 maitsü benogo. Pa January ita Australia nungi meyipa yokba sülen tang mezüngbuba Dubai nung asaya liasü.

Kasa mapang nung Alexander Zverev, shiba umpire indang chair nung racket agi azükba atema Acapulco asayamung nung shilem magidaktsü liasü, pa maneni tasembuba jenjang nung lir.

Nadal-a taküm asayamung asemubaba aser career nung title 91buba akokba sülen jenjang pezübaba tongtetogo. Spain nunger asayar ya taoba küm August ita Washington nung Lloyd Harris-i tsükdaktsüba

sülen tang tashi nung khen danga tamakok mongui asaya arudar.

ATP rankings:

1. Daniil Medvedev (RUS) 8615 pts (+1)
2. Novak Djokovic (SRB) 8465 (-1)
3. Alexander Zverev (GER) 7515
4. Rafael Nadal (ESP) 6515 (+1)
5. Stefanos Tsitsipas (GRE) 6445 (-1)
6. Andrey Rublev (RUS) 5000 (+1)
7. Matteo Berrettini (ITA) 4928 (-1)
8. Casper Ruud (NOR) 3915
9. Felix Auger-Aliassime (CAN) 3883
10. Hubert Hurkacz (POL) 3496 (+1)
11. Jannik Sinner (ITA) 3495 (-1)
12. Cameron Norrie (GBR) 3325
13. Denis Shapovalov (CAN) 3020 (+1)
14. Diego Schwartzman (ARG) 2865 (-1)
15. Roberto Bautista Agut (ESP) 2480
16. Pablo Carreno Busta (ESP) 2220 (+1)
17. Reilly Opelka (USA) 2156 (+1)
18. Nikoloz Basilashvili (GEO) 2121 (+1)
19. Carlos Alcaraz (ESP) 2061 (+1)
20. Taylor Fritz (USA) 2010 (-4)

Punjab Kings captain asütsü Mayank Agarwal shimogo

Tsüklai/February 28, 2022

(Agencies): Taruba Indian Premier League atema India Test team opener Mayank Agarwal Punjab Kings captain asütsü shimogo.

Arishi küm 31 tain Agarwal ya Bengaluru nungi lir aser pa ya Arshdeep Singh aser left-arm spinner Harpreet Brar na den külem Punjab Kings-i asayar asem retain asüba nung densema liasü.

"Ni 2018 küm nungi Punjab Kings nung asayar aser iba club tenüng nung asayatsü nemadanga bilemer. Team len anitsü atema maoangka agütsüba atema kanga pelar," ta Agarwal-i ashi.

"Ni iba khuret ya bendanga agüja agizüker, saka kasa mapang nung taküm Punjab Kings team nung asayar tajung aika aliba ajanga küm mapa tezübaba kümdaktsütsü," ta pai ashi.

Agarwal ya taoba mapang Punjab Kings vice-captain liasü aser taoba season-a mapang tatsükabo captain mapang inyakogo.

"Onok team nung tajangshiba tajung bener aliba asayar aser sempet tajung aketba lanur asayar aika lir, shinok maongka anguba



ajepzüksü atema tejangraba tulu nung atatepdar.

"Asayamung akoktsü timla nung onok teti asayar, aser team ka ama club atema mezüngbuba IPL trophy ajangkettsü atema onoki inyaktsü. Team anitsü atema management-i kü nem maongka agütsüba atema kanga pelar," ta Agarwal-i ashi.

Agarwal, shiba 2011 küm mezüngbuba IPL nung asaya liasü, pai taoba season ana nung run 400 dak tema yangluogo. Pai India team nungi Test 19 nungi century pezü densema run 1429 yanglua lir aser ODI pongu nung asayaogo.

Kasa mapang nung Punjab Kings head coach Anil Kumble-i, "Mayank ya 2018 küm nungi team nung

tongtibang asayar ka aser taoba küm ana lenir ama asaya aruogo. Onoki shimba team tasenba nung lanur asayar tajung aika aser asayar tejen tajungtem aika lir.

"Mayank lenisüba nung onoki tamendakdak tashitait ka yangerner. Pai tejangraba tulu nung kanga meranga inyaker aser pa team asayar ka lir, shiba dak lenir ka asütsü nüngdakba yimya ajak keta lir.

"Captain ama pa den inyaktsü yongya atar aser pai team takok dangi anitsü imlar," ta ashi.

Punjab Kings puri tang tashi nung 2014 küm dang IPL final tongteta lir. Parnok taoba asyamung asem nung team ti rongnungi jenjang trokbuba nung tembanga liasü.

FIFA-i Russia wako, nakloken tenokdangba agütsü

Tsüklai/February 28, 2022

(Agencies): FIFA-i Russia dang linük wako aser naklo ken mamshi neutral venue tem nung asayatsü tetuyuba agütsüba den Ukraine nung tensa tajungba meküma, parnok tetoktepba nungi mintoktsü akok ta tekümdangtsü metetdaktsüogo.

Ajisüaka sangdong koba FIFA-i "immediate first measures" ta ajar, iba jenjang agiba ya Europe nung aliba linüktemi teperi masü ta shiogo.

FIFA-i Ukraine nung Russia-i tashiyim amshiba aitsüogo aser ashiba agi, Russia nung international asaya ka danga ayongzüka masayatsü aser parnok bendanglen oa asayaba mapang linük wako aser naklo ken amshitsü memelatsü.

FIFA-isa, national team ya Russia team ama masayatsü saka Football Union of Russia (RFU) ama asayatsü aser kidang asayatsü aliba asayatem ajak neutral tesem ka nung fan tem medeni asayatsü, ta ashi.

Ajisüaka Polish Football Association tekolakba Cezary Kulesza-i FIFA-i jenjang agiba aitsüogo aser World Cup nungi Russia mintoktsü ayongzüko.

"Tanü FIFA indang telemtetba ya agizüktsü makoktsü. Onok tejak repranga asayaba asaya nung shilem agütsü tejangraba kecha mali. Onok tenokdakdak masetshi lir; team tenüng kechi südir süang Polish National Team Russia den masayatsü," ta pai Twitter nung zülutsü.

"FIFA indang Human Rights Policy ya o paper nung züluba dang mesüra, iba ya mapa küma inyakang aser Russian Football Association, 2022 küm Qatar

World Cup atema qualify tesüdaktsü," ta pai shisem.

Poland team Moscow nung March 24 nü asayatsü lir.

Russia-i iba asaya kokra parnok Czech Republic aser Sweden na asaya akokertem den kidang March 29 nü asayatsü lir.

Qatar nung November aser December ita World Cup asayatsü atema April 1 nü draw asütsü lir.

Czech Republic aser Sweden natia Russia den masayatsü ta shiatokogo.

Swedish federation tir Karl-Erik Nilsson-i website Fotbollskanalen dang ashiba agi, FIFA-i jenjang agiba agi pa temulung masür aser jenjang tesashiba ka agütsü imla liasü.

Paisa, FIFA-i ajak ajangzüksü atema jenjang agiba ajanga parnoki Russia den masayatsü atema telemtetba agiba memelenshir, ta ashi.

FIFA-ia linük asem tsüngda World Cup qualifiers asayatsü aliba dak sendakba nung ken o bentettsü atema lenmang ka bushitsü ta shiogo.

England Football Association-ia, parnok indang national team Russia den masayatsü ta shiogo.

Ajisüaka FIFA sangdong nung ano tenokdangba agütsüshitsü atema lenmang lapoka aliba sayuogo.

"FIFA-i tetoktepba balala nungi agintsü densema tenokdangba talila agütsütsü asoshi IOC, UEFA aser tanga sport organizations den maneni sensak asemtsü, koba tensa tajungba meküma tarutsü nung benoktsü akok," ta FIFA sangdong nung shia lir.

BWF-i Russia aser Belarus nung asayamungtem thitsü

Tsüklai/February 28, 2022

(Agencies): Alima nung Badminton asaya achayangba telok BWF-i Hombarnü Russia aser Belarus nung asayatsü aliba asayamungtem ajak thitsüogo. Russia-i Ukraine amak tenzüka sülen parnoki iba jenjang agia liasü.

BWF asayamung mapang Russia aser Belarus wako tem mesayatsü aser linük ana naklo ken matemtsü. Osang tejangja ka magütsü tashi Russia mesüra Belarus nung badminton asayamung ka danga ayongzüka masayatsü.

"BWF-i tensa maneni kanga junga meita atatsü aser Russia aser Belarus sorkar anema jenjang tesashiba agütsü atema saisapong achayangba lokti tentet balala den maneni tongtepratepa alitsü," ta BWF sangdong ka ajanga

metetdaktsü.

BWF-i ashiba agi, International Olympic Committee-i sports federation tem dang Russia aser Belarus nung asayamungtem ayongzüka asayatsü sentong alibatem ajak tanga tesemi belener aotsü mesüra thitsütsü atema mepeshia metetdaktsüba BWF-i pusemer.

"Rara anena yimjung atema alima nung saisapong balala azüokba telok ajaki nokdakba den BWF nokdaker," ta kasa sangdong ajanga metetdaktsü.

Russia-i Ukraine amak tenzüker anogo pongu jungogo aser iba nung Belarus-ia shilem agiba atema parnok nema tenokdangba balala agüja arudar.

Russia-i Ukraine amakba ya "special operation" ka ta shia arudar.

BILEMDANGANG

"Tanü inyaktettsüba mapa asüng atema anungzüka teyu; asüng anogo asenoki mejangja."